

# INFO



Informativni časopis Općine Novi Grad Sarajevo | januar 2021. godina | Broj 27

## *Otvorena sportska dvorana sa učionicama, obdaništem i ambulantom uz OŠ "Umihana Čuvidina"*



Vrtić "Vjeverica" na Alipašinom Polju  
otvara vrata mališanima

Novootvoreno igralište  
u naselju Vitkovac

Sanacija, asfaltiranje i proširivanje  
20 ulica







# CENTAR SAFET ZAJKO

REKREACIJA, SPORT I EDUKACIJA



# SADRŽAJ:

	Općinsko vijeće.....	5
	Privreda.....	8
	Infrastruktura.....	14
	Obrazovanje.....	30
	Sport.....	34
	Kultura.....	38
	Obilježavanja.....	46
	Ostale vijesti.....	52
	Civilna zaštita.....	56

## TELEFONI ZA HITNE INTERVENCIJE:

**HIGIJENSKI SERVIS**  
**+ 387 61 22 99 40**

**DEŽURNI INSPEKTOR**  
**+ 387 61 22 99 49**

### IMPRESUM:

IZDAVAČ:

Općina Novi Grad Sarajevo  
Tel.+387 33 291 100, 291-313  
E-mail: ngsabih.net.ba  
www.novigradsarajevo.ba

AUTOR I UREDNIK:

Amina Vatreš-Nezirević

GRAFIČKI UREDNIK:

Nihad Spahić

FOTOGRAFIJA:

Samir Kadić

## VAŽNIJI TELEFONI I E-MAIL ADRESE

### Služba za poslove Općinskog vijeća

033 291-130, fax. 033 291-271  
vijece@novigradsarajevo.ba

### Služba kabineta Općinskog načelnika

033 291-100 033 291-103; fax. 033 291-278  
infonovigrad@novigradsarajevo.ba  
ngsa@bih.net.ba  
aminapress@novigradsarajevo.ba

### Služba za privredu i lokalni ekonomski razvoj

033 291-122  
privreda@novigradsarajevo.ba

### Služba za urbanizam, imovinskopravne, geodetske poslove i katastar nekretnina

033 291-120; fax. 033 291-224  
urbanizam@novigradsarajevo.ba  
033 291-279  
imovinska@novigradsarajevo.ba

### Služba za opću upravu

033 291-233;  
opcauprava@novigradsarajevo.ba  
maticniured@novigradsarajevo.ba  
cern@novigradsarajevo.ba

### Služba za obrazovanje, kulturu i sport

033 291 117  
033 291 281; fax. 291 170  
obrazovanjeirazvoj@novigradsarajevo.ba

### Služba za boračka pitanja, rad, socijalna pitanja i zdravstvo

291-237; fax.291-164  
boracka@novigradsarajevo.ba  
033 291-173; fax. 291-173  
radisocijalnapitanja@novigradsarajevo.ba  
291-306; fax.291-281

### Služba za investicije i infrastrukturu

033 291-116  
investicijeikomunalno@novigradsarajevo.ba

### Služba za finansije

291-234; fax.291-319  
finansije@novigradsarajevo.ba  
ngsafin@bih.net.ba

### Služba za zajedničke poslove

033 291-107  
sacira@novigradsarajevo.ba

### Služba civilne zaštite

033 291-114  
cz@novigradsarajevo.ba

### Služba za lokalnu samoupravu

033 291-344  
mz@novigradsarajevo.ba

### Služba za inspeksijske poslove

inspekcija@novigradsarajevo.ba

### Pravobranilaštvo Općine Novi Grad Sarajevo

033 291-162  
pravobranilastvo@novigradsarajevo.ba







Općina Novi Grad Sarajevo





## Osigurana dodatna sredstva za podršku privredi

Općinsko vijeće Novi Grad Sarajevo održalo je, 10.09.2020. godine online sjednicu na kojoj je usvojen rebalans budžeta za 2020. godinu u iznosu od 53.343.300 KM, a kojim su osigurana dodatna sredstva za podršku privredi, dovršetak kapitalnih projekata i projekte cestovne infrastrukture i saobraćaja u mirovanju.

Radi se o drugom rebalansu budžeta, prvi je urađen u martu, na početku pandemije koronavirusa, kada su iz općinskog budžeta osigurana dodatna sredstva za rad Civilne zaštite, domova zdravlja i drugih ustanova uključenih u prevenciju i brobu protiv koronavirusa na prostoru općine Novi Grad Sarajevo, te podršku privredi.

Zbog posljedica pandemije prihodi u budžetu u ovoj godini su umanjeni za oko 7% ili između tri i četiri miliona konvertibilnih maraka. To je manji pad prihoda nego što se očekivalo kada je rađen prvi rebalans.

Rebalans je urađen tako da su osigurana

finansijska sredstva za kapitalne projekte čija je realizacija u toku. To se prije svega odnosi na izgradnju sportske dvorane i dogradnje škole „Umihana Čuvidina“ u Boljakovom Potoku, koja bi trebala biti završena u narednom mjesecu. Osigurana su sredstva i za dovršetak obnove dječijeg vrtića „Vjeverica“ na Alipašinom Polju, koji je također pri kraju, zatim i za druge projekte iz oblasti saobraćaja koje Općina radi samostalno ili u saradnji sa Direkcijom za puteve KS.

Istaknuto je da je u prethodnom rebalansu bilo povećanja sredstava kada je u pitanju podrška privredi, te da je više od 500.000 KM isplaćeno za minimalne plate za april i maj za oko 1.300 fizičkih lica koja su imala pad prihoda veći od 40%, a isto toliko sredstava izdvojeno je za podsticaj poljoprivredi.

Rebalansom budžeta osigurana su i sredstva za program prekvalifikacije za deficitarna zanimanja, kao i ostale vidove podrške koje je Općina i ranije izdvajala. Međutim, došlo je do umanjnja tekućih transfera u nivou

od oko 15%, jer se jedan dio tih aktivnosti nije mogao realizirati jer škole, sportski klubovi i neke druge institucije nisu radile u jednom periodu godine, tako da su ta sredstva usmjerena u privredu, kako bi podržali ostanak zaposlenosti na nivou na kojem je bio ili umanjili negativne posljedice koje su se odrazile na našu privredu i ekonomiju.

Na 35. sjednici Općinskog vijeća usvojena je i odluka o pristupanju izradi urbanističkog projekta „Vitkovac I“. Radi se o prostoru koji se nalazi od spoja LOT-a 2C kružnog toka u Briješću do iza područja IX transverzale, površine oko 9 hektara, odnosno prostoru između regulacionih planova „Boljakov Potok“, „Halilović“ i „Vitkovac“, koji je trenutno neuređen, a ovim projektom planira se izmještanje industrije koja je ranije bila u toj zoni.

Usvojena je i Odluka o donošenju Plana zaštite od požara Općine Novi Grad.





# SVEČANA AKADEMIJA POVODOM 16. DECEMBRA – DANA OPĆINE NOVI GRAD



Povodom obilježavanja Dana Općine Novi Grad, 16. decembra, u multimedijalnoj sali Općine održana je svečana akademija na kojoj su dodijeljene pojedinačna i kolektivna Zlatna i Srebrna plaketa "Safet Hadžić" i zahvalnice građanima i kolektivima koji su dali doprinos razvoju ove lokalne zajednice.

Zbog mjera koje su na snazi uslijed pandemije koronavirusa, akademija je održana sa manjim brojem zvaničnika, nego prethodnih godina, te je građanima bilo omogućeno praćenje putem direktnog prenosa na TVSA i zvaničnoj Facebook stranici Općine.

Akademiji su prisustvovali akademik dr. Mirko Pejanović, koji je bio član Predsjedništva Republike BiH u periodu agresije na BiH, Đemal Memagić, načelnik Općine Olovo, Vesna Travljanin, direktorica Saveza općina i gradova FBiH, dobitnici plaketa i zahvalnica, kao i pomoćnici općinskog načelnika mr. Semira Efendića.

Načelnik Efendić se obratio prisutnima i građanima koji su akademiju pratili putem prenosa uživo, te im je poželio sretan Dan Općine i poručio da će lakše prolaziti kroz izazove vremena u kojem živimo, ako svi zajedno budu imali više međusobne solidarnosti i što

budu bolje organizovani da adekvatno odgovore na izazove koji su pred nama.

Podsjetio je na početak godine i pojavu koronavirusa, te angažman Civilne zaštite Općine Novi Grad već u martu u punom kapacitetu, a koji traje i danas.

"U maju smo nastavili sa infrastrukturnim projektima, sve ono po čemu smo uvijek bili prepoznatljiviji, a neki događaji iz ljeta su ostavili neizbrisiv trag na sve uposlenike Općine. Jedan od naših kolega obolio je od koronavirusa, a prethodno i njegov otac, nažalost Mustafa i Midhat Imamović preminuli su od posljedica koronavirusa", kazao je Efendić.

Kao bivšim uposlenicima Općine, Odlukom Općinskog vijeća Novi Grad, rahmetli Mustafi i Midhatu dodijeljena je posthumno Zlatna plaketa "Safet Hadžić".

Dr. Pejanović se u svom obraćanju, osvrnuo na period osnivanja Općine Novi Grad i kazao da je 1978. godine imao ulogu vijećnika i potpredsjednika tadašnje Općine Novo Sarajevo, te da je bio u komisiji za podjelu te općine, čijom odlukom je formirana Općina Novi Grad Sarajevo. Kazao je i to da je bio radoznao kako će ta "nova" općina napredovati.

Prisjetio se i perioda provedenog na katedri Fakulteta političkih nauka u Sarajevu, kada je bio profesor načelniku Efendiću. "Mr. Efendić je, dok sam ja radio na fakultetu, bio jedan od boljih ili najboljih studenata, odličan student, a evo po svemu što radi i kolike rezultate sabira, odličan je u svemu", kazao je Pejanović na početku obraćanja, uputivši načelniku Efendiću čestitke na velikom povjerenju koje su mu ukazali građani općine na posljednjim izborima za treći mandat.

"Posmatrano u cjelini razvoja BiH, općine i gradovi se javljaju kao aktivni i nezaobilazni nosioci lokalnog, ekonomskog, infrastrukturnog i kulturnog razvoja svoga područja. Uspješan razvoj općina u BiH znači istovremeno uspješan razvoj države u cjelini", kazao je Pejanović.

Na svečanoj akademiji predstavljani su i najznačajniji kapitalni projekti čija je realizacija u toku, kao i oni koji će se realizirati u narednom periodu. Građani su imali priliku vidjeti i premijerno izvođenje himne Novog Grada, u izvedbi Nine Pršeša, koju je napisao i poklonio svojoj općini i njenim stanovnicima.



## Zlatna plaketa posthumno Mustafi i Midhatu Imamoviću



## Pojedinačna Zlatna plaketa profesorici Rabiji Bosnić



Pojedinačna Zlatna plaketa dodijeljena je profesorici Rabiji Bosnić za humanost. Rabija Bosnić, profesorica pedagogije i psihologije u sarajevskoj Petoj gimnaziji, pokazala je da je prijatelj, ali i sugrađanin kakav se samo može poželjeti. Svoj bubreg je donirala radnom kolegi Elviru Dugaliću, koji je u aprilu 2016. obolio i svaki drugi dan je morao odlaziti na dijalizu. Operacija je obavljena u Francuskoj 19. oktobra te godine. Zbog ovog nesebičnog i ljudskog čina profesorica Bosnić je proglašena humanistom 2017. godine u prosvjeti u Kantonu Sarajevo.

Zlatna plaketa „Safet Hadžić“ posthumno je dodijeljena nekadašnjim uposlenicima Općine Novi Grad Mustafi i Midhatu Imamoviću, za izuzetan doprinos u radu i razvoju lokalne zajednice. Rahmetli Mustafa i njegov sin Midhat preminuli su od posljedica koronavirusa. Mustafa je bio penzionisani uposlenik Općine, zaslužan je za odbranu RBiH od agresije i obnovu MZ „Olimpijsko Selo“ poslije agresije. Njegov sin Midhat bio je dobar sportista i aktivno se bavio košarkom, određeni period trenirao je u KK „Bosna“, a potom trenirao i podučavao mlađe naraštaje. Midhat je bio zaražen virusom COVID – 19, od pćijih je osljedica preminuo 4. augusta 2020. godine, nedugo nakon smrti oca Mustafe.

Kolektivna Zlatna plaketa „Safet Hadžić“ dodijeljena je Udruženju „OUT LOUD“ Sarajevo za unapređenje života građana treće životne dobi Općine Novi Grad Sarajevo.

Srebrna plaketa dodijeljena je svećeniku Đuri Živkoviću za poseban doprinos u humanitarnoj pomoći građanima

općine Novi Grad Sarajevo tokom proteklog rata. Nakon deceniju službe u novogradskom naselju Briješće, 1997. godine vratio se u rodnu Posavinu.

Rukometnom klubu Briješće dodijeljena je kolektivna Srebrna plaketa „Safet Hadžić“ za razvoj sporta na području općine Novi Grad Sarajevo i šire. Rukometni klub Briješće nastao je davne 1970. godine, prije punih 50 godina. Iznjedrili su sjajne rukometaše koji su okosnica nekih premijerligaških klubova. Od 2018. godine se takmiče u seniorskoj konkurenciji Federalne lige jug. Rukometni klub Briješće danas radi sa seniorskim timom, ali i sa mladima.

Na svečanoj akademiji uručene su i zahvalnice za doprinos u oblasti kulture, humanitarnog rada, obrazovnog sistema, ekologije i drugim oblastima: Mensudu Hajradinoviću, Melihi Metaj, Mirnesu Fehriću, Hidajeti Glavinić, Fuadu Omanoviću, Esadu Topuzu, Mušanu Dedajiću, Zumri Đelilović, Ramizu Holjanu i Karate klubu Novi Grad Sarajevo.





## Selzer Grupa i ASA Grupacija otvaraju 300 novih radnih mjesta u općini Novi Grad

Selzer Grupa i ASA Grupacija potpisali su ugovore o saradnji kojim će u 2021. godini u Sarajevu, u općini Novi Grad, biti otvorena fabrika za proizvodnju komponenti za sisteme transmisije hibridnih vozila, čime se otvara 300 novih radnih mjesta.

Ovaj poslovni korak predstavlja nastavak aktivnosti ASA Grupacije u saradnji sa stranim investitorima iz automobilske industrije. Početak proizvodnje planiran je početkom 2021. godine, a ASA Grupacija će pružiti kompletnu infrastrukturu, te obuku i zapošljavanje radnika.

„Zadovoljstvo nam je da smo danas zvanično potvrdili saradnju sa Selzer Grupom koja je odlučila investirati u BiH i izabrala ASA Grupaciju kao pouzdanog partnera za jedan takav korak. Ovo je još jedna potvrda opredijeljenosti Grupacije za jačanje bh. privrede kroz poduzetničku viziju, pružanje vrhunske usluge, kvalitetne infrastrukture i „one stop“ koncepta za strane investitore koji žele ulagati u BiH“, izjavio je Eldin Hadžiselimović, direktor ASA Grupacije.

Svečanom potpisivanju ugovora prisustvovao je i Semir Efendić, načelnik Općine na čijem području se nalaze sjedište i proizvodni kapaciteti ASA Grupacije.

„Veliki je broj država u Evropi, naročito Jugoistočnoj Evropi, koje se

danas bore za njemačke investicije, kada je u pitanju autoindustrija. Mi u toj borbi uspijevamo uzeti važno mjesto, tako da se ipak, na kraju, naši partneri odluče da ulažu u našoj državi, a ne u nekoj drugoj. Zadovoljan sam da u ovom teškom vremenu pandemije možemo najaviti otvaranje novih radnih mjesta i važne izvozne ugovore uz podršku ASA Grupacije“, rekao je načelnik Semir Efendić.

Zahvaljujući kontinuiranoj saradnji sa članicama Grupacije, ASA Šped i ASA Direkt i prethodnoj implementaciji sličnog projekta, na lokaciji Rajlovac već sada imamo preko 400 uposlenih u autoindustriji.

Nedim Musić, direktor Olympia Capital Partners, glavni investicioni savjetnik Selzer Grupe, pri odabiru buduće lokacije poslovanja istakao je da će investicija u inovativne i tehnologije budućnosti stvoriti blizu 300 direktnih radnih mjesta i predstavljati priliku za dodatni razvoj lokalnih dobavljača, što jasno ukazuje da je Bosna i Hercegovina konkurentno tržište za proizvodnju i izvozno orijentirane kompanije.

Poslovni objekat u Rajlovcu nalazi se na površini od preko 5.000 kvadratnih metara, a u prvoj fazi projekta planirana je instalacija opreme i mašina, obuka zaposlenika, te standardizacija procesa prema zahtjevima automobilske industrije.





## Asfaltiran krak Rajlovačke ceste prema firmi "Sprind" u industrijskoj zoni Rajlovac



Završena je rekonstrukcija kraka Rajlovačke ceste prema firmi "Sprind" u industrijskoj zoni Rajlovac.

U ovom dijelu saobraćajnice prvi put je riješena odvodnja površinskih voda, izgrađeni trotoari sa obje strane saobraćajnice, a postavljena je i nova rasvjeta, što će doprinijeti poboljšanju uslova za rad firme u ovom dijelu industrijske zone.

Privredni subjekti u prethodnim su godinama imali veliki problem sa površinskim vodama koje su se zadržavale na saobraćajnici, pravile velike lokve i led na cesti u zimskom periodu. Ovim radovima taj problem je riješen, a izvođač radova firma "MGBH" postavila je deset slivnika, čime je onemogućeno zadržavanje vode na cesti.

Predstavnik kompanije „Asa Šped“, koja tu djeluje, Emir Dinarević istakao je da u ovome dijelu ima oko deset firmi u kojima radi oko 1.500 radnika, te da je rekonstrukcijom ceste riješen njihov dugogodišnji veliki problem.





## ***Uz brojne novine i znatno povećanje podrške za sve vrste proizvodnje***



Općina Novi Grad Sarajevo osigurala je sredstva za direktne novčane podsticaje za animalnu, biljnu i gljivarsku proizvodnju, certificiranje proizvodnje, te investiranje u poljoprivredna gazdinstva.

Poučeni dosadašnjim iskustvima, informacijama prikupljenim sa terena, te na osnovu podataka i procjena o stanju i tendencijama na tržištu hrane i poljoprivrednih proizvoda, naročito izazvanim negativnim uticajem pandemije koronavirusa, izdvojena su znatno veća sredstva za direktne novčane podsticaj tekućoj proizvodnji i podršku razvoja poljoprivrede kao važne grane privređivanja.

Izdvojeno je 500.000 KM koje će biti utrošene za biljnu, animalnu i gljivarsku proizvodnju, nabavku plastenika, poljoprivredne opreme i mehanizacije, te izgradnju objekata. Od ove godine na snazi je i novi pravilnik koji je donesen radi poboljšanja uslova za ostvarivanje prava na novčane podsticaje, a kojim su omogućeni i podsticaji u peradarstvu (tovni pilići i koke nosilje), uzgoju tovnih junadi, te svih vrsta ratarskih, povrtlarskih i voćarskih kultura.

Novčani podsticaji za sve vrste proizvodnje su povećani, za neke i više od 100% u odnosu na prethodne godine. Ponuđeni su i bolji uslovi za preduzeća i gazdinstva koja se bave većom proizvodnjom, zapošljavaju veći broj radnika, primjenjuju moderne standarde i planiraju proširenje proizvodnje.

Važno je naglasiti da više nema gornje granice za broj grla stoke, košnica i poljoprivrednih površina koje su zasijane, u odnosu na ranija ograničenja. Do sada su građani mogli ostvariti podsticaj od najviše 2.000 KM za sve podnijete zahtjeve, dok ove godine nema te vrste ograničenja.



Ove godine na području općine Novi Grad zasijano je skoro tri puta više zemlje nego ranijih godina. Općina je građanima dala na korištenje oko 10 hektara zemlje, dok je kroz saradnju javnog preduzeća "Lokom", Civilne zaštite Općine Novi Grad i PD "Butmir" zasijano 11 hektara obradivih površina na području Rajlovačkog polja. Pored toga, PD "Butmir" na prostoru općine Novi Grad u ovoj godini samostalno obrađuje 14 hektara zemljišta.



## Na poljoprivrednom poligonu na Mojmilu u toku sjetva luka, salate, špinata i blitve



Na poljoprivredno - edukativnom poligonu urbane poljoprivrede na Mojmilu u toku je jesenja sjetva povrtlarskih kultura koje uspijevaju u zimskom periodu. Sjetva se vrši u plastenicima, gdje uposlenici JP "Lokom" sade luk, salatu, špinat i blitvu. Svježe, tek ubrano zeleno povrće, uzgojeno na prirodan način, bez upotrebe bilo kakvih pesticida i umjetnih gnojiva, građani će moći kupovati već u martu, a moći će se kupiti upravo na proizvodno - edukativnom poligonu na Mojmilu, u ulici Ferida Srnje bb, ali i na prodajnom Eko - štandu kod sportske dvorane Dobrinja.

Na površini od 1.300 metara kvadratnih zaštićenog prostora zasađeno je oko 140 kilograma luka, dok su na površini od oko 450 metara kvadratnih zasađeni špinat i blitva.

"Zasadili smo i oko 500, te pripremili još oko 1.500 presadnica salate, koje će biti zasađene narednih dana. Sve te kulture će se

naći na našem tržištu početkom marta naredne godine. U zavisnosti od vremenskih prilika, očekujemo prinose od oko jedne i po tone povrća", objasnio je Adnan Šabanović, iz preduzeća „Lokom“, zadužen za organsku proizvodnju.

Organska proizvodnja je sve češće prepoznata kao proizvodni sistem koji može zadovoljiti potrebe šire društvene zajednice, uz to je to jedan od načina kojim se stanovništvu omogućava da nadohvat ruke imaju zdravu, a domaću hranu.

Javno preduzeće "LOKOM" uspostavilo je proizvodno – edukativni poligon urbane poljoprivrede 2017. godine, koji podrazumijeva uzgajanje i distribuciju hrane u neposrednoj blizini naseljenih mjesta.





## **Programom prekvalifikacije radnika za deficitarna zanimanja omogućena obuka i zaposlenje za 43 nezaposlene osobe**



Načelnik Općine Novi Grad Sarajevo Semir Efendić potpisao je ugovore o sufinansiranju programa prekvalifikacije radnika za deficitarna zanimanja sa poslodavcima koji će u narednom periodu obučiti i zaposliti 43 nezaposlene osobe sa evidencije Biroa za zapošljavanje Novi Grad.

Riječ je o programu koji podrazumijeva zapošljavanje, obuku i stručno usavršavanje osoba sa evidencije nezaposlenih, za čiju realizaciju je iz budžeta Općine Novi Grad izdvojeno oko 235.000 KM.

Ugovori su potpisani sa firmama odabranim putem javnog poziva, koje su iskazale interes za prekvalifikacijom i zapošljavanjem radnika. „Fits“ d.o.o., Obrtnička djelatnost „Fits“, Obrtnička radnja „Eurotrend“, „Sprind“ d.d., „Zrak“ d.d., „Denimex“ d.o.o., te Ustanovom za obrazovanje odraslih „Nova znanja“.

Odabrane su firme koje se bave prerađivačkom i proizvodnom industrijom, jer je to baza i osnova naše privrede.

Meliha Drugovac, šefica komercijale u firmi „Zrak“ d.d. Sarajevo, istakla je da je za firmu namjenske industrije, kakava je firma iz koje dolazi, ovo izuzetno dobra prilika za novom radnom snagom.

„Zahvaljujemo se Općini Novi Grad što je prepoznala značaj ovakvih projekata, a važno je spomenuti da je „Zrak“, uz podršku ove lokalne zajednice, kroz sličan projekat već 2016/17. godine obnovio radnu

snagu koju danas ima. Naša firma ima kadrove koji se ne mogu pronaći na tržištu radne snage, niti se mogu obučiti kroz redovan sistem obrazovanja. Iz tog razloga neophodno je da se kroz prijenos tih znanja i vještina s jedne generacije na drugu, zanovi ta radna snaga. Stoga je ovakav vid podrške izuzetno značajan za svaku firmu, pa i za nas kao firmu dugogodišnje tradicije u svojoj specifičnoj oblasti koje nema na širem prostoru Evrope“, naglasila je Drugovac.

Poslodavci su u obavezi nezaposlene osobe primiti u radni odnos na minimalno 6 mjeseci, te ih obučiti za svoje potrebe, dok je Centar za obuku dužan provesti obuku nezaposlenih osoba i obezbijediti im zaposlenje kod poslodavaca na period od minimalno 6 mjeseci. Dio programa prekvalifikacije radnika za deficitarna zanimanja odnosi se na nabavku opreme, odnosno mašina za obuku kadrova, a poslodavac kojem su po osnovu javnog poziva dodijeljena sredstva za nabavku mašina, obavezan je zaposliti i obučiti osobe minimalno na period od godinu dana.

Program prekvalifikacije radnika za deficitarna zanimanja Općina Novi Grad provodi od 2017. godine, i dosadašnja iskustva su pokazala da su gotovo svi uposlenici koji su prošli program prekvalifikacije nastavili raditi u firmama u kojima su radili obuku i usavršavanje.



## Mali biznisi: Četrdeset novih radnih mjesta pokrenuto uz podršku Općine Novi Grad



### Ismail Halvadžija: "Velike stvari nastaju u teškim trenucima"

Ismail Halvadžija, multidisciplinovan je dizajner i kreativni direktor, naglašava da ima desetogodišnje iskustvo u poslovima dizajna. „Otvorio sam agenciju za dizajn i digitalni marketing pod nazivom „Onze Labs“. Fokus nam je izlazak na strano tržište, Amerika i EU. U julu smo otvorili agenciju, još smo na početku, za sada nam dobro ide. Trenutno djelujemo lokalno, spremamo se i za strano tržište. Pročitao sam, a i stojim iza toga, da velike stvari nastaju u teškim trenucima, pa sam razmišljao o tome i bilo je stvarno teško, međutim, kad sam se upustio u ove vode, kad se sve krenulo rješavati, nema više nazad“, kaže Ismail.

Ni situacija uzrokovana pandemijom koronavirusa ne sprečava one koji žele da privređuju i žive od vlastitog rada, da pokrenu sopstveni biznis. Takvih je u općini Novi Grad, iz godine u godinu sve više, a sa 40 novih samostalnih poduzetnica/ka – početnika u biznisu, načelnik Općine Novi Grad Semir Efendić potpisao je ugovore o sufinansiranju troškova njihovog poslovanja.

Radi se o jednoj od podsticajnih mjera, kojom ova lokalna zajednica pomaže razvoj privrede, odnosno povećanja broja održivih biznisa i kreiranja novih radnih mjesta na svom području, a za koju je iz budžeta za 2020. godinu izdvojeno 400.000 KM. Namijenjena je isključivo novoregistriranim obrtnicima, trgovcima i ugostiteljima, stanovnicima općine Novi Grad, a koju je do sada koristilo oko 300 početnika u biznisu.

Obzirom da se obrti i samostalna trgovinska i ugostiteljska djelatnost registriraju kao djelatnost putem Općinske službe za privredu i lokalni ekonomski razvoj, došli smo do zaključka da je period u prve dvije godine od pokretanja biznisa najteži period za one koji pokrenu neku vrstu biznisa. U saradnji sa ljudima koji su pokretali biznise ili ih pokreću, došli smo do ideje za uspostavljanje mjere koja podrazumijeva dvogodišnju finansijsku podršku. Otprilike se svakom obrtniku isplaćuje po 5.500 KM i to je podrška koja traje kontinuirano za sve one stanovnike općine Novi Grad koji su u posljednje tri godine pokrenuli biznis. Ovo je jedan od rijetkih programa u kojem nema

javnog poziva, već je otvoren u kontinuitetu do utroška sredstava.

Među onima koji su se usudili pokrenuti svoj biznis je tridesetdvo-godišnji Ervin Smajić. On je u julu ove godine pokrenuo obrt za projektovanje, dizajn i proračun cjevovoda za industrijska postrojenja. Ranije je, kaže, radio za neke strane firme u toj oblasti, nakon čega se odlučio da samostalno pokrene obrt. „Nadam se da ću uspjeti u ovom poslu i da ću se proširiti na neki biro koji će opsluživati više djelatnika za strane kompanije“, naglašava Ervin.

Amar Kunovac, je otvorio ugostiteljski objekat u Aerodromskom Naselju. „S obzirom na razne mjere restrikcije i veliki broj inspekcija, a i na činjenicu da je veliki broj ljudi ostao bez posla, pa gledaju gdje će potrošiti novac, ne možemo se žaliti. Zaposlio sam brata koji je bio na Birou, ja sam trenutno vlasnik, nas dvojica radimo. Nadam se da će se posao proširiti i da ćemo još nekog zaposliti, imam dosta bivših kolega koji su ostali bez posla, posebno u hotelima koji su većinom zatvoreni i nemaju posla. Hvala Općini Novi Grad na ovoj podršci, ovo je rijetkost u našem gradu i državi“, rekao je Kunovac.

Almir Šeta, otvorio kafić na Dobrinji V i zaposlio sina svog ratnog druga. „Ova pomoć Općine će nam dobro doći. Ne može uvijek biti sve crno, moramo zakoračiti naprijed, ne postoji opcija odustajanja, čak ni u poslovima koje sam ranije radio“, dodao je Šeta.





## ***Nove ploče na Bulevaru branilaca Dobrinje***

U naselju Dobrinja obnovljen je i drugi dio šetališta u ulici Bulevar branilaca Dobrinje, gdje je u prošloj godini završena temeljita rekonstrukcija prve polovine dionice. Time je kompletirano oko kilometar šetališta, koje je u prethodnom periodu redizajnirano i hortikulturno uređeno.

Ovom fazom radova izvršena je zamjena starog dotrajalog popločanja novim kvalitetnijim pločama, na dionici dužoj oko 400 metara, od spoja ulice Janka Jolovića do ulice Lava Tolstoja, gdje je prvi put nakon više od 30 godina zamijenjeno kompletno popločanje. Vrijednost ugovorenih radova iznosi 204.750 KM.

“Ploče na ovoj dionici šetnice bile su u jako lošem stanju, ugradili smo nove betonske ploče debljine 8 cm i ivičnjake. Postavili smo

betonske opločnike glatke kvarcne površine, sa impregniranom zaštitom koja omogućava veću otpornost na habanje, smrzavanje i sol, koja se koristi za posipanje tokom zimskog perioda radi sprečavanja poledice”, ističe rukovodilac gradilišta Almir Pozderac.

S obzirom na to da je zbog kretanja automobila dolazilo do oštećenja i bilo je skoro nemoguće sanirati pločnike, Općina Novi Grad je 2018. godine uradila ugradnju fiksnih i potapajućih stubića, kako bi se ograničilo kretanje vozila, te omogućio ulazak samo javnim službama poput hitne medicinske pomoći, vatrogasaca i policije. Realizacijom tog projekta stekli su se uslovi za nastavak uređenja šetališta na Bulevaru branilaca Dobrinje.





## *Izgradnja servisnih saobraćajnica i proširivanje parkinga*

Radnici građevinske firme „Grakop“ rade na sanaciji i proširivanju servisnih saobraćajnica i parkinga na širem prostoru naselja Dobrinja. Vrijednost projekta kojim se reorganizira unutrašnji saobraćaj u naselju Dobrinja iznosi 900.000 KM.

Ovim projektom će biti osigurano oko 200 novih parking mjesta u naselju Dobrinja. Time će se osigurati dodatni prostor za parkiranje vozila koja su se parkirala u pješačkoj zoni na Bulevaru branilaca Dobrinje.





## *Na Alipašinom Polju izgrađen parking sa 120 mjesta*



U A fazi Alipašino Polja, u ulici Bajrama Zenunija, izgrađen je novi parking sa 120 mjesta za parkiranje, koji je od stavljanja u funkciju svakodnevno ispunjen do posljednjeg mjesta.

U saradnji sa Savjetom MZ, putem Zbora građana, odabrana je ova lokacija za izgradnju parkinga, koji bi zadovoljio potrebe stanovnika ovog dijela naselja, nakon čega je Općinsko vijeće, na sjednici održanoj u septembru 2019. godine, potvrdilo Odluku da se na ovoj lokaciji izgradi parking prostor. Dio zelene površine, koja nije bila na najbolji način uređena, iskorišten je za izgradnju parkinga, uz koji se zadržava i veliki dio zelenih površina, a kroz sami parking izgrađeni su razdjelni pojasevi u kojima su zasađene sadnice stabala.

Izgradnja parkinga sa javnom rasvjetom koštala je oko 240.000 KM. Time je riješen dugogodišnji zahtjev građana ovog dijela Alipašino Polja.

Parking je dio Programa ugovorenog 2019. godine sa KJKP „Rad“, koji podrazumijeva izgradnju više od 500 parking mjesta. Jedan dio je već izgrađen, kod Doma zdravlja na Otoci, u Nedžarićima i drugim dijelovima Alipašino Polja, a cijeli Program je jedno značajno povećanje kapaciteta mjesta za parkiranje u centralnim dijelovima općine Novi Grad.

Izgradnjom novih i proširivanjem postojećih parkinga nastoji se riješiti problem nedostatka parking mjesta u Novom Gradu. Nakon toga ostaje rješavanje pitanja uređenja, korištenja parking mjesta, rezervacije, a sve je to moguće urediti na jedan puno efikasniji način kada bi se nadležnost sa višeg nivoa vlasti dala jedinicama lokalne samouprave.





## *Novi parking sa javnom rasvjetom u krugu IV PU*



U krugu IV Policijske uprave Novi Grad, u Švrakinom Selu, izgrađen je parking, sa oko 40 mjesta za parkiranje i javnom rasvjetom, čime je riješen dugogodišnji problem parkiranja vozila, kako za uposlenike PU, tako i okolnog stanovništva. Osim toga, oko cijele zgrade postavljena je nova ograda koja je zbog sigurnosnih razloga vrlo značajna, ali i antiteroristički podizači, odnosno blokada na samom prilazu zgradi policijske uprave. Ukupna vrijednost svih radova je oko 300.000 KM, a finansirala ih je Općina Novi Grad.

Ljudi koji rade u PU zauzimali su okolna parking mjesta i time smanjivali broj mjesta za parkiranje našim građanima, zbog čega se dešavalo da neki od građana budu kažnjeni. Izgradnjom parkinga omogućeno je da sada sva vozila uposlenika PU mogu biti parkirana u krugu uprave, uz sam objekat, zbog sigurnosti vozila, ali i zbog rasterećenja okolnih parkinga.

Završene radove obišli su načelnik Općine Novi Grad Sarajevo Semir Efendić, ministar unutrašnjih poslova KS Ismir Jusko i načelnik IV PU Idriz Efendić, sa saradnicima i vijećnicima Općinskog vijeća Novi Grad.

Ministar Jusko istakao je da je Općina Novi Grad, zajedno sa načelnikom Efendićem, proteklih godina kontinuirano svake godine donirala i pokriva troškove određene infrastrukture.


“Ovim projektom riješen je jedan od najvećih problema koje je imala ova PU, koliko god to nekom izgledalo simbolično, za ove ljude je to od strateškog značaja. Ljudi koji rade ovdje svoje automobile morali su parkirati na drugoj strani. Sada imamo jednu moderno uređenu PU sa pratećom infrastrukturom, parkingom, barijerama za ulaz u krug PU, visokom ogradom”, rekao je Jusko







## Postavljena LED rasvjeta na parkiralištima u naseljima Dobrinja, Alipašino Polje i Otoka



Nakon što je u 2019. godini obnovljena javna rasvjeta na 26 parkinga, na području općine Novi Grad nova rasvjeta postavljena je na još sedam parkirališta u naseljima Dobrinja, Alipašino Polje i Otoka, gdje su postavljeni novi i reparirani postojeći stubovi, te postavljena nova LED rasvjetna tijela.

U toku je izvođenje radova na još sedam parkinga u Starom Hrasnom, na Otoci, u C fazi Alipašinosog Polja i Olimpijskom Selu. U narednom priodu rasvjeta će biti postavljena na još 25 parkinga, čime će sva parkirališta u općini Novi Grad biti osvijetljena novom štednom rasvjetom.

U augustu je okončana javna nabavka za najpovoljnijeg ponuđača, nakon čega se krenulo u realizaciju projekta vrijednog oko 340.000 KM, kojeg finansira Općina Novi Grad. Za izvođača radova izabran je konzorcij firmi SES i STEP.

Parkinzi su bili veoma loše osvijetljeni, jer rasvjeta nije mijenjana proteklih 40 godina. Zamjenom postojeće dotrajale rasvjete, LED rasvjetom, poboljšat će se osvijetljenje, pri čemu će se stanovnici općine Novi Grad osjećati sigurnije. Osim toga, bolja rasvjeta doprinosi funkcionalnosti i sigurnosti parkiranja, ali i kretanja građana, a istovremeno štedi električnu energiju.

Općina je prošle godine započela projekt zamjene rasvjete na svim parkiralištima na svom području. Kako bi se u potpunosti uvelo reda na području Novog Grada, potrebno je da Općina preuzme kontrolu saobraćaja u mirovanju, koju trenutno provodi Ministarstvo saobraćaja KS.





## *Puštena u funkciju nova javna rasvjeta duž šetališta u A-fazi Alipašinog Polja*



U A-fazi Alipašinog Polja puštena je u funkciju nova javna rasvjeta na Trgu solidarnosti i Trgu međunarodnog prijateljstva. Stara rasvjeta u potpunosti je zamijenjena novom led rasvjetom koja troši znatno manje električne energije, a istovremeno daje bolji efekat osvjetljenosti.

Šetnica prolazi kroz dvije mjesne zajednice i bila je izuzetno mračna, jer rasvjeta nikada od izgradnje naselja nije rekonstruisana, bilo je dosta oštećenih stubova, a veliki broj sijalica nije bio u funkciji.

Postavljeno je 87 novih stubova sa led rasvjetnim tijelima na dionici od oko jednog kilometra, od zgrade Općine do studentskih domova u Nedžarićima. Radovi su koštali oko 200.000 KM.

Dio je to programa izgradnje javne rasvjete u 2020. godini u sklopu kojeg će stara rasvjeta biti zamijenjena i na preostalim 37 parkinga,

čime će svi parkinzi u općini Novi Grad dobiti novu led rasvjetu. Husein Musić, stanovnik Mjesne zajednice "Alipašino Polje A-2" izrazio je radost zbog ovog projekta koji će mu, kako kaže, značajno olakšati život. „Ranije je ovdje bilo jako mračno, bilo se teško kretati i imali smo dosta problema. Zahvaljujući Općinskoj administraciji i općinskom načelniku, došao je i ovaj trenutak, dobili smo rasvjetu i više nema straha. S obzirom da imam problema sa vidom, teško se bilo kretati u večernjim satima. Pravo da vam kažem bilo me je strah, dešava se sve i svašta, u granap se nije smjelo otići navečer. Sada sam presretan, zahvaljujući svima koji su učestvovali u realizaciji ovog značajnog projekta“, ističe Husein.

Ovim radovima, u ulici Ive Andrića, gdje se spajaju dva trga, pješački prelaz osvjetljen je kvalitetno i značajno je povećana osvjetljenost na tom dijelu.





## *Vrtić „Vjeverica“ na Alipašinom Polju otvara vrata mališanima*

Radovi na obnovi i adaptaciji vrtića „Vjeverica“, koji se nalazi u A fazi Alipašinog Polja privode se kraju, i uskoro će obnovljeni objekat otvoriti vrata mališanima ovog dijela općine Novi Grad.

Radi se o drugom po veličini objektu za predškolski odgoj i obrazovanje, pored vrtića „Dječiji grad“ na Mojmilu, ukupne površine oko 1.500 metara kvadratnih, te prostorijama za devet odgojnih grupa, kapaciteta za oko 300 djece. Objekat se nalazi u zelenoj oazi, izdvojen od gradske gužve i saobraćaja, a ima i vlastito dvorište u sklopu kojeg će biti izgrađena vanjska igrališta i parkovski sadržaji. U dijelu objekta površine oko 300 metara kvadratnih, koji je tehnološki odvojena cjelina, bit će smješten Centar za zdravo starenje, koji će također imati vlastiti dio uređenog vanjskog prostora za boravak i druženje osoba treće životne dobi. Projekat rekonstrukcije objekta pokrenula je Općina Novi Grad 2013. godine, kada je zamijenjen krov, a objekat zatvoren i zaštićen od daljeg propadanja. Skupština KS u decembru 2016. godine, odbila je prijedlog Općine Novi Grad o zajedničkoj rekonstrukciji objekta, zbog čega je izgubljeno dosta vremena, te je Općina 2019. godine samostalno i uz saglasnost Javne ustanove „Djeca Sarajeva“ pokrenula sve aktivnosti na rekonstrukciji objekta.

Ukupna vrijednost radova koje su zajednički finansirali Općina Novi Grad i Ministarstvo obrazovanja, nauke i mladih iznosi 2,2 miliona KM.





# Završena adaptacija i opremanje prostora Centra za komunalne usluge i u Novom Gradu



Općina Novi Grad Sarajevo adaptirala je prostor od oko 100 metara kvadratnih, u ulici Dobrinjske bolnice br.15 na Dobrinji i opremila ga za potrebe Centra za komunalne usluge, kako bi građanima olakšala i omogućila plaćanje režija na jednom mjestu. U dijelu objekta otvoreno je odjeljenje Službe za opću upravu Općine Novi Grad, gdje će stanovnici Dobrinje moći završiti i određene administrativne poslove bez dolaska u zgradu Općine.

Načelnik Općine Novi Grad Semir Efendić potpisao je sporazum o saradnji sa v.d. direktorima kantonalnih javnih komunalnih preduzeća „Sarajevogas“, i „Rad“ Ibrahimom Karahodžićem i Mirsadom Hošićem, i izvršnim direktorom u preduzeću „Toplane - Sarajevo“ Predragom Mladenom, a potpisivanju je prisustvovala i ministrica komunalne privrede i infrastrukture KS Nihada Glamoč. Predstavnici KJKP „ViK“ nisu se odazvali pozivu, zbog kako su naveli, još nedefinirane upravljačke strukture u tom preduzeću.

Iako je sve spremno za početak rada, nažalost preduzeća neće moći početi raditi, zbog činjenice da im je uvođenjem moratorija na zapošljavanje onemogućeno zapošljavanje, ali i interni premještanji zaposlenika.

„Nažalost u jednoj smo apsurdnoj situaciji da nakon što smo sve pripremili, preduzeća ne mogu preuzeti svoje šaltere koji su spremni za rad. Po mom mišljenju iz razloga što Skupština KS već duži vremenski period uvodi anarhiju u Kantonu Sarajevo time što stvari koje su riješene zakonom ona dodatno remeti svojim zaključcima, koji su u osnovi nezakoniti“, izjavio je načelnik Efendić.

Uspostavljanje Centra za komunalne usluge u općini Novi Grad, bila je inicijativa Kluba vijećnika DF-a u Općinskom vijeću Novi Grad, nakon što su ranije u dvije općine otvoreni takvi centri u kojima građani na jednom mjestu mogu rješavati zahtjeve kada su u pitanju priključivanja, isključivanja, plaćanja i sve ostale administrativne poslove vezane za usluge kantonalnih javnih komunalnih preduzeća.

## Stavljeno u funkciju i odjeljenje Službe za opću upravu Općine Novi Grad



U novootvorenom postoru, Općina je stavila u funkciju izdvojeno odjeljenje Službe za opću upravu, gdje će građani moći ovjeriti dokumente, preuzeti sve obrasce koji se mogu preuzeti u zgradi Općine, ali i provjeriti stanje predmeta u upravnom postupku.

U planu je da već od naredne godine bude uvezan sistem sa matičnim uredom, koji je uvezan na cijeloj teritoriji Federacije BiH, kako bi se mogli izdavati rodni listovi i uvjerenja iz matične knjige vjenčanih, umrlih i drugi dokumenti vezani za matične knjige.

Odjeljenje Općine Novi Grad na usluzi je građanima radnim danima od 8 do 16 sati.





## *Obnovljen pješački most na Otoci*

Općina Novi Grad Sarajevo realizirala je projekat sanacije pješačkog mosta preko Miljacke na lokalitetu Otoka Meander, radovi su dio prve faze projekta uređenja šetališta s desne strane Miljacke, koje će se u narednom periodu raditi od Otoka do Hrasnog.

Most je izgrađen 2003. godine i od tada nije obnavljan, a svakodnevno ga koristi na desetine pješaka. Zbog velike frekvencije, došlo je do oštećenja betonskih dijelova mosta, ali i antikorozijske zaštite glavnih čeličnih nosača mosta i ograde.

Osim što je most dobio potpuno novi i ljepši izgled, ovim projektom poboljšana je i sigurnost pješaka, naročito djece koja idu u Osnovnu školu "Mehmedalija Mak Dizdar".







## *Rekonstrukcija glavne naseljske saobraćajnice u Zabrdū*

U Zabrdū je u toku rekonstrukcija preostalog dijela ulice Avde Palića, glavne saobraćajnice u ovom naselju. Projekt u vrijednosti od 1.080.000 KM zajednički finansiraju Općina Novi Grad i Direkcija za puteve KS, a implementator projekta je Općina Novi Grad. U prethodnom periodu je rekonstruisano 1.400 metara ulice koja je bila značajno oštećena, zbog saobraćanja kamiona prema gradskoj deponiji, a u narednom periodu bit će rekonstruisano oko 900 metara ceste.

Saobraćajnica će po prvi put imati pješačku stazu, to je vrlo važno zbog djece koja idu u školu, ali i zbog svih drugih stanovnika našeg naselja Zabrdē. To je dio aktivnosti na proširenju ulica u Novom Gradu, posebno onih u kojima se odvija javni gradski prevoz.

Osim rekonstrukcije saobraćajnice u punom profilu sa dvije saobraćajne trake i pješačkom stazom, u ovoj ulici bit će urađena i oborinska odvodnja.







## Završena sanacija, proširivanje i asfaltiranje 20 lokalnih ulica

U okviru Programa investicionog održavanja i popravke ulica i lokalnih i nekategorisanih cesta za 2020. godinu na području općine Novi Grad Sarajevo rekonstruisano je i asfaltirano 20 lokalnih cesta. Za tu namjenu iz općinskog budžeta izdvojeno je 1.170.000 KM.

Program je podijeljen u dva LOT-a. U okviru ugovora LOT - 1 firma "MGBH" izvela je radove u devet ulica, dok ugovor LOT - 2 obuhvata 11 ulica, a izvođač radova je firma "Orman".



Osim asfaltiranja i sanacije oštećenih cesta, asfaltiran je i veliki broj ulica koje do sada nisu imale asfalt, kao što su Butilska od br. 19 do 37, zatim dio Butilske ulice od broja 111 do broja 147, sanacija ulica Mihaljevska do broja 133 i Paljevska do broja 302, u mjesnoj zajednici „Dobroševići“.



Ulica Butilska



Ulica Mihaljevska



Ulica Paljevska



U naselju Zabrdje prvi put su asfaltirani dijelovi ulice Porodice Zimić od broja 11 do spoja sa ulicom Porodice Šehić, kao i dio ulice gazi Mehmed-paše Fidahića od broja 27 do broja 19, i do spoja sa ulicom Safeta Zajke.



Ulica Porodice Zimić



Ulica Mehmed-paše Fidahića

U naselju Briješće urađena je rekonstrukcija i proširivanje dijela ulice Izeta Karšića, gdje je izgrađen trotoar za pješake, te dva autobuska stajališta, prethodno je urađeno 400 metara oborinskog kolektora, a postavljene su cijevi FI 300 I FI 400. Izmješteni su stubovi za javne rasvjete, a da bi se saobraćajnica proširila riješeni su i imovinsko-pravni odnosi. U ovom naselju prvi put je asfaltiran i dio ulice Briješće brdo od broja 148D.



Ulica Izeta Karšića



Ulica Briješće brdo





Asfaltiran je dio ulice Bana Borića od broja 62 do broja 74, kao i dio ulice Ragiba Džinde od broja 224 do broja 232, te dijela ulice Ragiba Džinde čikma od broja 166 do broja 206, i kraka te ulice, u mjesnoj zajednici „Alipašin Most-1“, dok je u MZ „Alipašin Most-2“, tačnije u ulici Kasima Hadžića do broja 111, saniran potporni zid koji je bio u jako lošem stanju i obrušavao se na saobraćajnicu.



Ulica Bana Borića




Ulica Ragiba Džinde



Potporni zid, ulica Kasima Hadžića

U Švrakinom Selu saniran je i asfaltiran dio ulice Ali-bega Firdusa čikma od broja 23 do broja 1. Urađeno je proširenje i asfaltiranje dijela ulice Rasima Turkušića, kojom se odvija javni gradski prevoz. Asfaltirano je oko 110 metara ulice Branislava Nušića od broja 135D do broja 135 u naselju Saraj - Polje



Ulica Ali-bega Firdusa



Ulica Branislava Nušića



Ulica Rasima Turkušića



U mjesnoj zajednici „Buća Potok“ završena je sanacija i asfaltiranje neasfaltiranog dijela ulice Derviša Sude Vražalice od broja 25, kao i asfaltiranje dijela ulice Adema Buće od broja 225 do broja 235. Asfaltiran je i dio ulice Asima Čamdžića od broja 3 do spoja sa ulicom Adema Buće i izgrađen potporni zid uz saobraćajnicu. U MZ „Dolac“ završeni su radovi na proširivanju ulaza u dvorište škole „Avdo Smailović“. U naselju Aneks asfaltirana je ulica Velikokladuška od broja 23 do broja 11.



Ulica Derviša Sude Vražalice



Ulica Adema Buće



Potporni zid, ulica Asima Čamdžića



Ulaz u dvorište škole „Avdo Smailović“





## Završena rekonstrukcija i proširenje glavne ulice u Naselju heroja Sokolje



Projekat rekonstrukcije ulice Numan-paše Ćuprilića, glavne ulice kroz Naselje heroja Sokolje, gdje je u proteklom periodu urađeno proširenje saobraćajnice i izgradnja trotoara, završen je asfaltiranjem ceste u punom profilu. Prethodno je u ovom dijelu ulice urađena rekonstrukcija dotrajale vodovodne mreže i priključenje stambenih objekata na novoizgrađenu vodovodnu mrežu, tako da su mještani ovog gusto naseljenog područja uz vodovodnu mrežu dobili i potpuno novu i širu saobraćajnicu sa pješačkom stazom, što će omogućiti bolju saobraćajnu komunikaciju.

Saobraćajnica je od izuzetne važnosti jer povezuje naselja Sokolje i Brijesće, a njome se odvija javni gradski prevoz. Cesta je bila uska i nije imala trotoar, pa je saobraćajna komunikacija bila otežana, a zbog stalnog curenja vode iz dotrajalih cijevi bila je i oštećena.

Zbog toga se pristupilo zamjeni vodovodnih instalacija, a potom i

proširenju ceste sa izgradnjom pješačke staze. Proširenje saobraćajnice urađeno je uz podršku jednog broja stanovnika koji su se odrekli dijela svog zemljišta, dok je jedan dio zemljišta oslobođen od ranijih uzurpacija, tako da se sada nesmetano mogu mimoilaziti vozila.

U sklopu proširenja ceste radilo se i uklanjanje postojećih, te izgradnja novih potpornih zidova, postavljanje ivičnjaka i izgradnja trotoara, te odvodnja oborinskih voda, a nakon toga pristupilo se rekonstrukciji i asfaltiranju kolovoza u punom profilu. Radovi su izvedeni na dionici od spoja sa ulicom Zaima Imamovića do spoja sa ulicom Samira Radovca.



## *Proširen ulaz u Brezansku i ulicu Safeta Ahmetspahića u Briješću*



Nakon nekoliko godina rada na projektu separatne kanalizacione mreže za ulice Safeta Ahmetspahića i Brezanska u naselju Briješće, kako bi se iz pravca Stupa došlo do početka ovih ulica sa primarnim kolektorom, u 2020. godini izvedeni su radovi na izgradnji cjevovoda ukupne dužine oko 800 metara. Pored toga, izvršeno je proširenje i asfaltiranje ulaza u ulice Brezanska i Safeta Ahmetspahića, gdje je dio zemljišta poklonjen za potrebe proširenja puta, dok je jedan dio Općina otkupila od vlasnika.

Iako nije bilo planirano prvobitnim projektom, u ulici Brezanska zamijenjeno je i oko 200 metara vodovodne mreže, obzirom da se prilikom iskopa naišlo na dotrajali azbestni cjevovod koji nije bio na propisnoj dubini, te je zamijenjen novim daktinlim.



# Otvorena sportska dvorana sa učionicama, obdaništem i ambulantom uz OŠ "Umihana Čuvidina"

Na Dan Općine Novi Grad Sarajevo, 16. decembra i 43. godišnjicu njenog formiranja svečano je otvorena sportska dvorana sa pratećim sadržajima uz Osnovnu školu "Umihana Čuvidina" u Boljakovom Potoku.

Stavljanje u funkciju ovog impozantnog objekta, koji u svom sastavu, osim sportske dvorane olimpijskih dimenzija ima i nove školske prostorije, dječiji vrtić, ambulantu, fitness centar i druge prateće sadržaje, svojevrsni je poklon građanima ovog dijela Novog Grada.

Objekat su svečanim presijecanjem vrpce otvorili direktorica OŠ "Umihana Čuvidina" Amela Kazazić, općinski načelnik Semir Efendić, ministar kulture, nauke i obrazovanja Anis Krivić i premijer Vlade KS Mario Nenadić, nakon čega je upriličen zabavno - sportski program.

Načelnik Efendić čestitao je građanima Dan Općine i prisutnima poželio dobrodošlicu na svečanost povodom otvaranja sportske dvorane. "Sportska dvorana sa pratećim sadržajima koju danas stavljamo u funkciju jedan je od objekata koji će promijeniti način života stanovnika Novog Grada, naročito ovog područja koje gravitira sportskoj dvorani, ali i ostalim naseljima. Potpisali smo ugovor sa JU Djeca Sarajeva o preuzimanju na korištenje vrtića. Oni očekuju da će u februaru raspisati javni poziv za prijem djece koja će ići u ovaj vrtić. Objekat u kojem se nalaze učionice već može biti u funkciji Osnovne škole, kao i sportska dvorana. Objekat će služiti budućim generacijama i sredstva koja su uložena u ovaj objekat nisu potrošena, njih će trošiti generacije koje su pred nama", rekao je načelnik Efendić.

Sportska dvorana je napravljena po svim standardima kada su u pitanju dvoranski sportovi, rukometa, košarke, malog nogometa... Zadovoljava uslove igranja i reprezentacije.

Direktorica škole, Amela Kazazić, u ime učenika, roditelja i uposlenika škole zahvalila je Vladi Kantona Sarajevo, na čelu sa premijerom Nenadićem, ministrom Krivićem i načelniku Semiru Efendiću, kao i prethodnom menadžmentu škole, koji su učestvovali u pripremi i realizaciji ovog projekta.

"Svoje znanje učenici će sticati u ovih devet učionica, savremeno opremljenih, i u dva kabineta informatike. Više vremena će provoditi družeći se sa knjigom u velikoj biblioteci sa čitaonicom, a u ovoj velikoj dvorani će nastaviti sa vannastavnim aktivnostima. Ovo je jedan od najljepših dana za naše učenike, roditelje, nastavnike i, naravno, mene same. Sedmog decembra smo proslavili pedesetu godišnjicu naše škole, a ovo je jedan od najljepših poklona koje smo mogli dobiti za taj rođendan i rođendan naše Općine Novi Grad. Čestitam svim sugrađanima Dan Općine Novi Grad", rekla je direktorica Kazazić.

„Velika mi je čast što ste nas danas pozvali na otvaranje jednog ovakvog objekta. Mislim da bi najstarija bošnjačka književnica Umihana Čuvidina bila ponosna da vidi i zna da jedan ovakav objekat nosi njeno ime. Ovdje se ne radi o utrošku sredstava, nego o ulaganju, ulaganju u budućnost naše djece", istakao je premijer Nenadić.

U izgradnju ovog objekta Općina Novi Grad je samostalno krenula 2018. godine, a izgradnja je trajala oko dvije i po godine. U njegovu izgradnju uloženo je oko 6,5 miliona KM, od toga je Općina kroz svoje budžete tri godine za njegovu izgradnju izdvojila oko 5,2 miliona KM, dok je Ministarstvo obrazovanja, nauke i mladih KS izdvojilo oko 1.300.000 KM. Za opremanje objekta izdvojeno je oko 950.000 KM, od čega Ministarstvo izdvojilo 500.000 KM, a Općina oko 450.000 KM.







## ***Potpisani sporazumi o primopredaji vrtića, školskih prostorija i ambulante***

Nakon svečanog dijela otvaranja sportske dvorane načelnik Semir Efendić potpisao je i sporazume o primopredaji školskih prostorija, obdaništa i ambulante, sa direktoricom škole Amelom Kazazić, direktoricom JU "Djeca Sarajeva" Suanitom Banda i JU "Dom zdravlja" KS Muhamedom Ahmićem.

Direktorica Banda izrazila je zahvalnost načelniku Efendiću koji ima sluha za sve probleme i poteškoće u JU "Djeca Sarajeva" i Vladi KS. "Naši najveći problemi bili su velike liste čekanja djece za upis u vrtić. Vrtić će imati četiri odgojno-obrazovne grupe, dvije jasličke i dvije mješovite grupe. Planiramo početak rada sredinom februara. Ministarstvo za nauku, obrazovanje i mlade treba da formira komisiju koja će utvrditi da li vrtić odgovara pedagoškim standardima i normativima. Samim tim ćemo raspisati javni poziv za upis djece u ovaj vrtić", rekla je Suanita Banda.

Direktor Ahmić izrazio je zadovoljstvo stavljanjem u funkciju nove ambulante porodične medicine. "Veoma sam sretan da stavljam u funkciju još jednu ambulantu. Pored problema koje imamo sa pandemijom koronavirusa, u ovim okolnostima je to još značajniji uspjeh. Koliko je ambulanta značajna govori podatak da će joj gravitirati oko 15.000 stanovnika i već sad ima 8.000 zdravstvenih kartona u ovoj ambulanti", rekao je Ahmić.



## *Ruksaci sa školskim priborom i knjigama za oko 1.300 učenika prvog razreda*



Načelnik Općine Novi Grad Sarajevo Semir Efendić sa saradnicima je početkom školske 2020/21. godine obišao nekoliko novogradskih osnovnih škola, gdje je prvačićima poželio sretan početak školovanja. Tom prilikom đacima su uručeni ruksaci sa komplet udžbenicima i školskim priborom.

U prvi razred osnovnog obrazovanja, u 15 novogradskih škola, upisano je oko 1.300 prvačića, a ovo je prvi put da Općina Novi Grad, pored ruksaka i školskog pribora, za prvačiće osigura i komplet udžbenike. To je mali doprinos lokalne zajednice učenicima i njihovim roditeljima, da lakše započnu novu školsku godinu.

Osnovna škola "Aleksa Šantić" ima najviše upisanih prvačića, 161 prvačić raspoređen je u šest odjeljenja, što je zaista veliki broj ako se u obzir uzme podatak da je u općini Stari Grad upisano ukupno nešto više od 200 učenika prvog razreda, dok sama ova škola ima 161 prvačića.

U cjelokupnoj ovoj situaciji zbog koronavirusa, to je mali doprinos lokalne zajednice njihovom lakšem početku školovanja i njihovim roditeljima, koji barem nisu morali brinuti oko kupovine udžbenika i školskog pribora.

Pored toga, Služba civilne zaštite Općine Novi Grad svakodnevno u svih 15 osnovnih škola u općini Novi Grad vrši dezinfekciju prostorija

nakon svake smjene, kako bi se zaštitilo zdravlje učenika i nastavnog osoblja i školama olakšalo u provođenju nastavnog procesa.

Rasija Ibrahimović, direktorica Osnovne škole "Aleksa Šantić" iskala je da je ove godine zbog pandemije koronavirusa neobičan početak školske godine, ali da se ljudi prilagođavaju novonastaloj situaciji.

"Bilo bi to daleko teže da nema ljudi koji mogu doprinijeti olakšanju života u ovoj situaciji, jedan od njih je i načelnik naše Općine, a čija Služba za obrazovanje nas je još u maju obavijestila da će u budžetu planirati i sredstva za nabavku udžbenika i školskog pribora, naglasivši da će to biti komplet udžbenici, pribor i ruksaci, tako da su, zahvaljujući tome, prvačići spremni za početak školske godine, bez dodatnog opterećenja njihovih roditelja. Posebno mi je drago što je ovo škola sa najvećim brojem učenika u Kantonu Sarajevo", izjavila je Ibrahimović i dodala:

"Škola ima praksu da svake godine organizira bazar tokom kojeg se vrši razmjena udžbenika između učenika, koja također dobro dođe roditeljima".

Direktorica Ibrahimović istakla je i podršku Općine u sanaciji krova područne škole na Mojmilu, tako da sada djeca od prvog do četvrtog razreda mogu boraviti u školi.



## PODRŠKA ON-LINE NASTAVI:

## ***U OŠ "Fatima Gunić" otvorena "elektronska zbornica", olakšano provođenje online nastave***

U Osnovnoj školi „Fatima Gunić“, jednoj od novogradskih osnovnih škola sa najvećim brojem učenika, stavljena je u funkciju takozvana „elektronska zbornica“, prostorija za nastavno osoblje opremljena novim laptop uređajima, u kojoj će nastavnici raditi na provođenju online nastave.

Laptop uređaji, su instalirani u zbornici, poklon su Ambasade Kraljevine Saudijske Arabije i Kulturnog centra „Kralj Fahd“, koji već 20 godina djeluje na području općine Novi Grad.

Otvaranje „elektronske zbornice“ upriličeno je na Nacionalni dan Kraljevine Saudijske Arabije i godišnjice postojanja Kulturnog centra „Kralj Fahd“, koji su školi „Fatima Gunić“ poklonili 15 laptop uređaja.

Svečanosti je prisustvovao Hani bin Abdullah Mominah, ambasador Kraljevine Saudijske Arabije u BiH, direktor Kulturnog centra "Kralj Fahd" u BiH doc.dr. Muhamed Alu Šejh sa saradnicima, ministar za obrazovanje, nauku i mlade KS Anis Krivić, dopredsjedavajuća Gradskog vijeća Edina Gabela i predstavnici Službe za obrazovanje, kulturu i sport Općine Novi Grad, kao i predstavnici OŠ "Fatima Gunić" sa direktorom Hajrudinom Čuprijom.

Učenici škole porijeklom iz Saudijske Arabije izveli su prigodan program, a gostima su uručene zahvalnice za doprinos u razvoju obrazovanja.

U OŠ „Fatima Gunić“ ranije je otvorena i „elektronska učionica“ za rad učenika, koji neke zadatke ne mogu raditi na laptop uređajima, tako da im je osiguran prostor sa 20 računara, gdje mogu doći i uraditi domaće zadatke.



## ***Stipendije za učenike i studente sa područja općine Novi Grad***



Općina Novi Grad Sarajevo i ove će školske godine stipendirati učenike i studente, a za tu namjenu iz općinskog budžeta osigurano je 450.000 KM.

Pravo na dodjelu stipendije mogu ostvariti redovni učenici javnih ustanova srednjih škola i redovni studenti javnih visokoškolskih ustanova koji imaju prebivalište na području općine Novi Grad Sarajevo, koji ne primaju stipendiju po drugom osnovu i čija primanja po članu domaćinstva ne prelaze 450 KM.

Na javni konkurs mogli su se prijaviti učenici koji su ostvarili prosjek u prethodnoj školskoj godini najmanje 4,5, te studenti sa prosjekom ocjena iz prethodne akademske godine 8,0. U proteklom periodu, od školske 2012/13. godine, stipendirano je 4.444 učenika i studenta, za šta je utrošeno 3.450.000 KM budžetskih sredstava. Dio sredstava dodijeljen je učenicima i studentima sportistima koji postižu zapažene rezultate na takmičenjima.

Od prethodne školske godine (2019/20.) Općina Novi Grad je promijenila sistem stipendiranja učenika srednjih škola u želji da potakne učenike da upisuju srednje škole u kojima će steći znanja i vještine u zanimanjima koja su deficitarna na tržištu rada. Ova lokalna zajednica želi dati podsticaj mladima, koji imaju nižu prosječnu ocjenu, da upišu zanat, nakon kojeg će biti spremni za tržište rada.

Pravo na stipendiju imaju učenici srednjih strukovnih škola koji se obrazuju po trogodišnjem programu obrazovanja i ostvaruju prosjek ocjena najmanje 3,0.

Uvedena je i olakšica za studente tehničkih i medicinskih fakulteta koji apliciraju na Javni konkurs. Najniži prosjek ocjena za studente medicinske i tehničke grupacije nauka iznosi 7,5, dok za ostale fakultete ostaje 8,0.

Stipendije se dodjeljuju za jednu školsku godinu i isplaćivat će se za 10 mjeseci (septembar – juni). Učenici srednjih škola će primati po 75 KM mjesečno za deset mjeseci, što znači 750 KM godišnje, a studenti po 100 KM, odnosno 1.000 KM godišnje.





## *Izgradnja "Tenis parka Sarajevo" na Dobrinji*

Općinsko vijeće Novi Grad Sarajevo usvojilo je Odluku za pristupanje izradi izmjena i dopuna Regulacionog plana "Dobrinja"- izgradnja "Tenis parka Sarajevo".

Ovom Odlukom stvaraju se planske pretpostavke za izgradnju "Tenis parka Sarajevo" sa otvorenim i zatvorenim teniskim terenima, terenima za mini tenis, svlačionicama, prostorom za fitness, trim stazom, učionicama i drugim pratećim sadržajima.

Predviđeno je da prijedlog regulacionog plana bude završen do augusta ove godine, a nakon upoznavanja građana sa prijedlogom plana putem javne tribine, u septembru ove godine plan bi trebao biti dostavljen Općinskom vijeću na razmatranje i usvajanje.

Izmjenama RP predviđeno je da se "Tenis park Sarajevo" gradi na površini od 1,9 hektara, na prostoru mjesne zajednice "Dobrinja - B" tačnije prekoputa Međunarodnog aerodroma Sarajevo, uz XII transverzalu.

Obzirom da Sarajevo nema prateću infrastrukturu za tenis, posebno za treniranje tokom zime i održavanje teniskih turnira koji zahtijevaju cjelodnevni, ali i višednevni boravak, neophodno je izgraditi veliki teniski centar, koji bi zadovoljio sve svjetske propise i normative.

Prvi teniski centar ovakve vrste gradio bi se na Dobrinji, a koncipiran je tako da može odgovoriti potrebama najsavremenijih trenažnih procesa, gdje se mogu organizirati turniri najvišeg svjetskog ranga.

Centar bi imao veliku salu za treninge, učionice za mlađi uzrast, restoran, smještajne kapacitete za igrače, pet otvorenih, tri teniska terena zatvorenog tipa, dva terena za mini tenis izgrađena po svjetskim normativima, prostor za dnevni boravak, salu za fitness, restoran, bar i sl. Također, projektom su predviđene i prostorije (uredi) za rukovodstvo centra, tenis šop, kao i drugi sadržaji koji mogu zadovoljiti cjelodnevni boravak na terenu.



## ***Nove tribine i prenosni koševi u Centru "Safet Zajko"***

U Centru "Safet Zajko" postavljene su nove tribine sa 400 sjedećih mjesta na fudbalskom stadionu sa atletskom stazom. Na košarkaškom igralištu postavljeni su novi prenosni koševi sa mehanizmom za dizanje i spuštanje, što će olakšati korištenje prostora u zimskom periodu za potrebe klizališta. Postavljena je i tabla sa zaštitom od padova i povreda.

Uskoro se završava opremanje osam svlačionica, a u narednoj godini planirana je i zamjena gornjeg sloja atletske tartan staze, prema propisima, nakon pet godina korištenja.







## *Otvoren novoizgrađeni stadion sa umjetnom travom i tribinama u naselju Vitkovac*

Revijalnom utakmicom koju su odigrali mali fudbaleri Omladinskog fudbalskog kluba "Biser 96", 26. oktobra, stavljen je u funkciju novoizgrađeni stadion sa umjetnom travom, tribinama i zaštitnom ogradom u naselju Vitkovac.

U proteklom periodu na prostoru općine izgrađeno pet sportskih dvorana, sa dvoranom u školi „Umihana Čuvidina“. Općina nastoji da naselja imaju dovoljno i sportskih i dječijih igrališta, kako bi se na kvalitetan način moglo provoditi slobodno vrijeme, i osigurali uslovi da bi buduće generacije mogle odrastati kroz igru i sport.

Otvaranje stadiona zbog pandemije koronavirusa upriličeno je uz prisustvo manjeg broja građana naselja Briješće, Vitkovac i Boljakov Potok, te predstavnika OFK "Biser 96", uz poštivanje epidemioloških mjera.







## ***Razvijati sportski duh kod djece i mladih***

Prisutnima se obratio i Almir Jusić, predsjednik Skupštine udruženja OFK „Biser 96“. Naglasio je da je stadion od izuzetne važnosti kako za školu fudbala, tako i za stanovništvo naselja Boljakov Potok i Briješće.

“Ovom prilikom želim da se zahvalim načelniku i njegovim saradnicima koji su ispunili obećanje dato sredinom prošle godine, kada se razgovaralo o izgradnji zamjenskog stadiona. Kao što je poznato, naš stadion koji trenutno koristimo nalazi se na trasi IX transverzale i on će se rušiti. Udruženje OFK „Biser 96“ postoji već 24 godine, naš cilj je da okupljamo djecu i mlade, da razvijamo sport, jednu zdravu atmosferu u samom društvu”, istakao je Jusić.

On se zahvalio općinskom rukovodstvu na konstantnoj podršci kroz razna sufinansiranja, kao što je Memorijalni turnir „Smajo Šikalo“ i prepoznatljivi Biser - kup, koji se organizira već šest godina.



# U blizini zgrade Općine otvoren historijski park "Bosanski stećak i zastava"

U povodu Dana državnosti Bosne i Hercegovine, Općina Novi Grad upriličila je svečano otvaranje parka "Bosanski stećak i zastava", koji se nalazi prekoputa zgrade Općine.

Park sa dva srednjovjekovna nadgrobna spomenika - stećka, koji datiraju iz 14. i 15. stoljeća a koje je Općina u saradnji sa JU "Muzej Sarajeva" u proteklom periodu izmjestila iz trolejbuskog terminala, zaštitila ih i konzervirala, upotpunjen je sa sedam zastava BiH, koje datiraju iz različitih historijskih perioda BiH.

Zastave imaju svoje historijsko utemeljenje u našoj historiji i potvrda su kontinuiteta državnosti BiH, zajedno sa stećcima čine jednu cjelinu. Zastave su dokaz postojanosti naše države još od vremena stećka, kojeg možemo smatrati kamenom temeljcem BiH.

"Neka ovaj mali park bude vizuelni podsjetnik za sve naše generacije koje žive, odrastaju ovdje u Novom Gradu i Sarajevu, neka to bude podsjetnik na njihovu historiju, da vide koje je sve faze prošla naša država kako bi mi danas obilježavali Dan državnosti - 25. novembar", kazao je načelnik Efendić.

Prisutnima su se obratili bh. književnici Abdulah Sidran i Gradimir Gojer.

„Najpametniji ljudi svijeta složili su se u jednoj stvari da smisao čovječanstva kroz hiljade i hiljade godina nema nikakvog drugog smisla osim onog kojeg mu daje kultura. U tom svjetlu, ako gledamo šta smo mi danas učinili, šta je učinila ekipa načelnika Efendića, to spada u visokorazvijenu svijest o tome da bez svijesti o kulturi nema svijesti o postojanju, bez svijesti o tome da smo bića kulture nismo nikakva bića, idemo u red neke druge žive vrste, ali se čovjekom koji misli ne možemo zvati, zbog toga sam sretan ovdje danas", riječi su akademika Sidrana.

Bh. pisac, reditelj i teatrolog Gradimir Gojer, kazao je da je njegovanje bosanske kulture i tradicije, kao i njegovanje svake kulture i tradicije pitanje kontinuiteta.

"Ovo što je danas uradio načelnik Općine Novi Grad Semir Efendić stavljajući stećak i zastave iz povijesti države BiH u jedan predivan ambijent je ne samo doprinos tom kontinuitetu, nego održavanje kontinuiteta, poklonjenje državi BiH. To je način da mladi kroz ovakve parkove stiču znanje da imaju povijest i da im je povijest osigurana", kazao je Gojer.

Istraživanje o bh. zastavi kroz historiju koja je dokaz kontinuiteta BiH, još od vremena Kraljevine BiH, ali i XX stoljeća uradio je mr. historije Ervin Klepo. On je istakao da je njegov zadatak bio identificirati i hronološki posložiti najvažnija državna znamenja BiH.

"Slobodno mogu reći da pred vama stoji jedna sažeta historija BiH od 14. do konca 20. stoljeća kroz prizmu njezinih simbola. Naročito sam ponosan što smo uspjeli ući u trag izgledu zastave srednjovjekovne bosanske države iz vremena njezinih banova, od druge/ treće decenije 14. stoljeća, pa do 1377. godine. Druga zastava je zastava koju su koristili bosanski kraljevi, od 1377-1463. godine, kao i zastavu pokreta za autonomiju, dva pokreta koja su još tada, u okolnostima borbe protiv vrhovne vlasti Osmanskog carstva željela da izbere bosansku autonomiju. Tu zastavu koristio je i pokret za otpor Austro-ugarskoj okupaciji 1878. godine, nakon što je Bosna Berlinskim kongresom predana na upravu ovoj srednjeevropskoj monarhiji, zastava BiH iz Austro-ugarskog perioda, zastava narodne i socijalističke Republike BiH iz perioda 1945-1992. godine, čuvena bosanskohercegovačka zastava nastala u okolnostima bosanske državnosti i njezine državne samostalnosti i aktualna zastava BiH, i sa kojom se država BiH danas identificira", rekao je Klepo.







## Izložba u povodu 95 godina od rođenja prvog predsjednika RBiH Alije Izetbegovića



Izložbom pod nazivom „Alija Izetbegović – Između Istoka i Zapada“ simbolično je obilježena 95. godišnjica od rođenja prvog predsjednika nezavisne Bosne i Hercegovine.

Otvaranju u Galeriji Općine Novi Grad prisustvovali su članovi porodice rahmetli predsjednika Predsjedništva RBiH, odnosno sve troje njegove djece, sin Bakir Izetbegović, član Kolegija Doma naroda PS Bosne i Hercegovine i predsjednik SDA i kćerke Lejla i Sabina, što je rijetko u javnosti.

Prisutnim gostima dobrodošlicu je poželio načelnik Semir Efendić, istakavši da Općina Novi Grad ima dugogodišnju saradnju sa JU Muzej „Alija Izetbegović“.

„Naziv izložbe „Alija Izetbegović – Između Istoka i Zapada“ odmah me asocira na njegovu knjigu „Islam između Istoka i Zapada“. Ne znam da li je neka knjiga u mom životu na mene ostavila toliki utisak, to slaganje pojmova koje čovjek na vrijeme posloži u životu veoma je važno. Posebno njegova razmatranja odnosa između kulture i civilizacije koje se često u interpretacijama izjednačavaju, ili njegovi pogledi na islamsku filozofiju života u poređenju sa drugim religijama, nešto su što nikada neću zaboraviti“, rekao je načelnik Efendić.

Izložba je na 40 hronološki poredanih panela prikazala politički i privatni život Alije Izetbegovića, njegov lik, djelo i ideje za koje se zalagao i borio tokom svog života.

Izložba je jako značajna iz razloga što su posjetitelji po prvi put imali priliku da vide neke fotografije koje su pronađene u porodičnoj arhivi. Imali su priliku da kroz ovu izložbu upoznaju jednu sasvim drugu stranu našeg prvog predsjednika, kroz njegove porodične fotografije, ali i fotografije njegovog političkog i diplomatskog života.





## ***“Dijalog” izložba radova umjetnika iz 15 zemalja predstavljena u Galeriji Općine Novi Grad***



S ciljem da stanovnicima općine učini dostupnim obrazovno-kulturni sadržaj, Općina Novi Grad ima višegodišnju saradnju sa raznim kulturnim ustanovama. U saradnji sa Galerijom “Preporod”, u Galeriji Općine Novi Grad, u septembru, je otvorena Internacionalna izložba pod nazivom “Dijalog”.

Tehniku radova čini ulje i akril na platnu, a izložena su 23 umjetnička djela 23 umjetnika iz 15 zemalja: Njemačke, Francuske, Italije, Grčke, Turske, Ukrajine, Sjevernog Kipra, Albanije, Kosova, Sjeverne Makedonije, Rusije, Srbije, Hrvatske, Crne Gore i BiH.

Voditeljica Galerije “Preporod”, Mirsada Baljić, kaže da su izloženi radovi umjetnika koji su bili u posjeti Sarajevu i BiH, nakon čega su na platno prenijeli svoje impresije našim gradom i državom. Osim izlaganja radova u Galeriji “Preporod” svoje radove nikad ranije nisu predstavljali bh. javnosti.

Poručila je da putevi umjetnosti idu preko umjetnika, preko lijepe riječi i informacije, a na ovaj način se uspostavlja mostovi kulture i međusobni dijalog.

## ***Predstavljena izložba “Sarajevo u Ljetopisu Mula Mustafe Bašeskije”***

Krajem jula, u Galeriji Općine Novi Grad otvorena je izložba “Sarajevo u Ljetopisu Mula Mustafe Bašeskije” Gazi Husrev-begove biblioteke u Sarajevu, koja se realizuje u okviru saradnje Općine Novi Grad sa institucijama kulture.

Na dvanaest izložbenih panela predstavljene su interesantne teme Bašeskijinog “Ljetopisa”, prikazane su biografije učenih ljudi iz grada Sarajeva, te položaj i društveni angažman žene. Iz arhiva Gazi Husrev-begove biblioteke izloženo je sedam fotografija Sarajeva s kraja 19. i početka 20. stoljeća.

Na izložbi je predstavljen i rukopisni primjerak “Ljetopisa”, koji se od 1917. godine čuva u Gazi Husrev-begovoj biblioteci u Sarajevu.







## ***Izložba sarajevskog umjetnika Adisa Lukača "Reljef otjelovljenje crteža"***



Posjetioци Galerije Općine Novi Grad imali su priliku u junu pogledati izložbu "Reljef otjelovljenje crteža", mladog sarajevskog umjetnika Adisa Lukača. Izloženi radovi izvedeni u reljefu predstavljaju uhvaćen trenutak između crteža kao pretka i pune skulpture kao konačne slobodne forme u prostoru.

"Ono što je karakteristično, kako i sam naziv izložbe govori, jeste da je publici prikazano ono što nastaje u mraku, u intimi između umjetnika i umjetničkog djela, odnosno šta se dešava sa crtežom u njegovoj transformaciji kada teži da prelazi u neku moguću punu skulpturu, da osvaja prostor. Reljef je jedini izraz koji može to da dočara. A ono što može biti poveznica sa današnjim vremenom je priča tog prilagođavanja i transformacije, tako da se ta linija prilagođava plohi, a ta ploha se prilagođava formi koja izbija prema površini, a i mi živimo danas u vremenu kada se moramo zbog korone prilagođavati novom načinu života", ističe Lukač.

Svoje umijeće Lukač je pokazao kada je sa svojih deset prstiju napravio spomenik kralju Tvrtku I, koji krasi grad Tuzlu, a nastao je kroz razne druge umjetničke projekte - poput biste narodnom heroju Ivanu Goranu Kovačiću u Sarajevu i reljefa Hasanaginica, postavljenom u Narodnom pozorištu Sarajeva.

Lukač se pored skulpture i klasičnog pristupa istoj, bavi i slikarstvom, pa u svojim izložbama kombinuje različite medije-crtež, sliku i skulpturu.





## ***U Galeriji Općine Novi Grad izložena umjetnička djela braće Ive i Luke Šeremeta***



Izložba pod nazivom "Ivo i Luka Šeremet" se realizovala krajem augusta u saradnji sa "Umjetničkom galerijom BiH", a posjetitelji su mogli pogledati 25 umjetničkih slika braće Ive i Luke Šeremeta.

Direktor "Umjetničke galerije BiH", Strajo Krsmanović, kazao je da nastoji da učini dostupnim radove onima koju su zainteresovani za umjetnost gdje god je to moguće i da ga raduje što se izložba može realizovati u galerijskom prostoru Općine Novi Grad.

"Podržavamo nastojanje Općine Novi Grad da umjetnost približi svojim građanima i što imamo priliku da izlažemo u ovom lijepom galerijskom prostoru. Mi smo ovaj put došli sa radovima Ive i Luke Šeremeta iz našeg bogatog fundusa", kazao je Krsmanović.

Osnovni element likovnog jezika Ive Šeremeta je boja kroz koju ispoljava spontani slikarski rukopis. Energični i dugi potezi kista primjetni su na pejzažima, a najčešće odabire gradske i planinske motive.

Luka Šeremet, za razliku od starijeg brata, slikarsku prirodu ispoljava kroz akvarel. Tehnika akvarela zahtijeva mnogo vještine, strpljenja i preciznosti. Slojevi boje se grade od najsvjetlijih i najprozirnijih, prema tamnijim i gušćim nanosima. Sadržaji njegovih slika govore o tome da je Luka Šeremet slikar koji teži prikazati moderni gradski život.







## *„Apokaliptične vizije“ – izložba mladih umjetnika sa područja Novog Grada*

U Centru za kulturu Dobrinja – Vila Hadžihalilovića početkom septembra, predstavljena je izložba „Apokaliptične vizije“ mladih umjetnika iz Novog Grada.

Postavku izložbe čini 30 radova, predstavljenih kroz različite refleksije i vizije mladih umjetnika nastalih u vrijeme dvomjesečne izolacije, prouzrokovane pandemijom koronavirusa.

Članovi „Asocijacije kreativaca“ su studenti likovnih umjetnosti koji kroz fotografije, grafike, crteže, slike, skulpture i produkt dizajn stvaraju prepoznatljivu tematsku cjelinu izložbe „Apokaliptične vizije“. Umjetnički duh ispoljavaju kroz težnje, boli, ljubavne emocije, nadu i unutrašnju borbu.





## Muzičko - poetska večer glumca Miodraga Mikija Trifunova

Muzičko - poetska večer "Svjedok" u izvedbi glumca Miodraga Mikija Trifunova upriličena je u augustu u Centru za kulturu Dobrinja - Vila Hadžihalilovića.


Trifunov je prepoznatljiv po izvrsnoj interpretaciji poezije, a publika je imala priliku da uživa u stihovima Tina Ujevića, Maka Dizdara, Mike Antića i drugih pjesnika.



## Izložba "Skender Kulenović: Bosna je sve što imam"

U Centru za kulturu Dobrinja - Vila Hadžihalilovića mogla se pogledati izložba "Skender Kulenović: Bosna je sve što imam."

Projekat implementira "Bošnjački institut – Fondacija Adila Zulfikarpašića" uz podršku Općine Novi Grad Sarajevo, a cilj je promocija lika i djela istaknutih ličnosti iz bh. kulture i historije, po čijim imenima su nazvane osnovne škole na području Novog Grada.







## **Godišnjica formiranja 5. motorizovane brigade: Hrabri i odlučni borci uspjeli su odbraniti Dobrinju i grad Sarajevo od agresora**

Peta motorizovana brigada formirana je 6. jula 1992. godine na Dobrinji, kao reakcija odbrane naselja od agresora, a koje je u potpunosti bilo odsječeno od grada. Borci 5. motorizovane brigade, svojom hrabrošću i odlučnošću uspjeli su da odbrane Dobrinju koja je bila 72 dana u potpunoj blokadi.

Hajriz Bećirović, aktivni sudionik u pripremi, organizaciji, naoružavanju i odbrani RBiH, i autor knjige „Dobrinjska ratna drama“, napisane da nove generacije podsjeća i uči o našoj historiji, uručio je svoje knjige članovima šehidskih porodica, ističući da su svi koji su živjeli u ratnom periodu na području Dobrinje veliki heroji.

Predsjednik Organizacionog odbora Reuf Vejo, ratni operativac Dobrinjske brigade, ukazao je također na bitne detalje iz perioda ratnih dešavanja na Dobrinji.

Muharem Hamzić, autor knjige „Dobrinjska tvrđava“, koju je posvetio svim borcima Dobrinje koji su dali svoje živote braneći Dobrinju od agresora, ali i svim njenim stanovnicima, Hamzić je također uručio porodicama šehidskih porodica.



## **Otvoren „Muzej veterana Dobrinje 1992-1995. godine“**

U ulici Habibe Stočević na Dobrinji otvoren je „Muzej veterana Dobrinje 1992 – 1995. godine“.

„Mi iz Općine Novi Grad ćemo nastojati da pomognemo ovaj projekat, jer je ovo mjesto za našu djecu koja nisu bila rođena i koja su bila mala, pa ne pamte kakav je belaj prošao bošnjački narod. Pokušat ćemo sa Službom za obrazovanje organizovati da djeca ovaj Muzej obilaze i nešto nauče“, rekao je Tajib Delalić, pomoćnik načelnika Općine Novi Grad za boračka pitanja, rad, socijalna pitanja i zdravstvo.

Elvedin Puška, inicijator ideje za otvaranje „Muzeja veterana“ kaže da će i u narednom periodu sakupljati eksponate, kako bi muzej bio što autentičniji i obogaćeniji.

„Trenutno na Dobrinji, osim ratnog tunela D-B, nema više ništa vezano za ratna dešavanja da se može pogledati i obići, pa sam se sa par prijatelja dogovorio da počnemo nešto praviti. Sakupili smo ratne eksponate, ali posao još nije gotov, nastavit ćemo dopunjavati Muzej i prikupljati eksponate koliko bude u našoj mogućnosti“, naveo je Puška.





## 27 godina od masakra u ulici Hakije Turajlića, ne prolaze tuga i bol za ubijenim članovima porodice

Polaganjem cvijeća, učenjem Fatihe i odavanjem počasti nevino ubijenim sugrađanima, obilježena je 27. godišnjica masakra počinjenog u ulici Hakije Turajlića do broja 39, na Dobrinji. Na tom mjestu, 12. jula, rasprskavajućom minobacačkom granatom ispaljenom sa položaja vojske Republike srpske ubijeno je 13 građana, a 14 ih je teže i lakše ranjeno.

Tog 12. jula 1993. godine, dok su čekali u redu da naspnu vodu iz bunara, ubijeni su Ilham Jelovac, Ajdin Kirlić, Ljiljana Matić, Nedžiba Mehonić, Rahima Mehonić, Sedajeta Mehonić, Dragica Mićanović, Sulejman Selimović, Zoran Simić, Enisa Talić, Ibro Talić, Jasna Tvrtković i Stela Tvrtković.

Sa mjesta stradanja Sarajlija poručeno je da nikada ne smijemo zaboraviti zločine nad sarajevskim civilima zbog budućih generacija, te da zločinci moraju biti izvedeni pred lice pravde.

Roditelji ubijenih ističu da je bol za djetetom vječna, da žive, ali kao da nisu živi. Svakog 12. jula dolaze na mjesto masakra, prolijevajući suze za svojim najmilijim, i tako punih 27 godina. Srca mnogih od njih nisu mogla izdržati ogromnu bol, te ih danas nema na obilježavanju godišnjice masakra. Nije danas među roditeljima ubijenih bilo ni oca rahmetli Ajdina Kirlića, kao ni prethodne godine, koji je dok je bio živ, na ovom mjestu gorko plakao za izgubljenim sinom.

Svake godine Fatima Isaković dolazi na mjesto gdje je ubijen njen otac, imao je 64 godine, kaže da se dobro sjeća da je spremala

ručak, čekajući oca da dođe kući sa vodom koju je trebao nasuti iz bunara. "Spremala sam ručak, u jednom trenutku, začula se jaka detonacija, sirene kola Hitne pomoći, jedan mladić, komšija dođe i reče mi da je i moj otac među ranjenim. Međutim, ubrzo je izdahnuo dok su ga nosili na nosilima", priča nam uplakana Fatima.

Ovi nedužni ljudi ubijeni su čekajući da naspnu vodu, a na ovakav način su ubijeni i drugi brojni građani Sarajeva, čekajući u redu za hljeb, sankajući se, igrajući se, ubijeno je mnogo mladosti, djece i omladine koja bi, da nije tako bilo, danas imala svoje porodice, djecu i unuke.



## Godišnjica masakra u Geteovoj ulici na Alipašinom Polju

Delegacija Općine Novi Grad Sarajevo, Udruženja roditelja ubijene djece opkoljenog Sarajeva 1992-1995. godine, porodice ubijenih, predstavnici mjesnih zajednica Alipašino Polje C-1 i C-2, Općinskog vijeća Novi Grad, obilježili su godišnjicu stradanja građana i položili cvijeće na mjesto masakra u ulici Geteova 4, na Alipašinom Polju.

Prije 25 godina, 6. jula, na ovom mjestu počinjen je jedan u nizu stravičnih zločina tokom opsade Sarajeva. Granata ispaljena sa srpskih položaja usmrtila je pet sugrađana. Da tragedija bude veća, ubijena je jedna kompletna porodica, porodica Đoren, Božo, Hena i njihova kćerkica Magdalena koja je imala 5 godina. Tog dana ugašena su još dva mlada života, ubijen je Elvir Ahmović koji je imao 17 godina i Nijaz Bajramović koji je tada imao 22 godine.







## **Sjećanje na sugrađane ubijene agresorskom granatom u ulici Ilije Engela na Otoci**

Delegacije Općine Novi Grad Sarajevo, Udruženja roditelja ubijene djece opkoljenog Sarajeva 1992 -1995., članovi porodica i prijatelji ubijenih obilježili su 30. jula 27. godišnjicu pogibije naša četiri sugrađanina, koji su granatom ispaljenom sa položaja vojske RS, ubijeni u ulici Ilije Engela na Otoci.

Kada je ubijen, Jasmin Terović je imao 12 godina, a Irma Hadžimuratović u trenutku ranjavanja imala je 6 godina. Iako je nakon ranjavanja premještena u inostranstvo na liječenje, Irma je dvije godine nakon toga preminula. U tom masakru, ubijena je i Irmina majka, Elvira Hadžimuratović i sugrađanka Vera Kovačević.

Predsjednik Udruženja roditelja ubijene djece opkoljenog Sarajeva 1992 – 1995. godine Fikret Grabovica podsjetio je da je ovo samo jedan od mnogobrojnih zločina koje je počinio agresor u svrhu ostvarivanja projekta zvanog „velika Srbija“. Agresor u svojim namjerama nije prezao ni od čega, pa je tako u Sarajevu tokom agresije ubijeno 1.601 dijete.

Izet Klino, brat ubijene Elvire i daidža ubijene Irme, rekao je da ovakvih ploča ima na stotine, da su one svjedok agresije koja se izvršila na Bosnu i Hercegovinu, te naglasio da ga najviše boli negiranje zločina.



## **Granatom ispaljenom sa položaja vojske RS iz pravca Nedžarića ubijeno 11 građana**

Prije 28 godina, 30. augusta, oko 12:00 sati, sa položaja vojske Republike Srpske, iz pravca Nedžarića, ispaljena je minobacačka granata kalibra 120 mm, od čijeg je dejstva poginulo 11 civila, a 53 je teže i lakše ranjeno dok su čekali u redu za hljeb.

Polaganjem cvijeća na spomen-ploču i učenjem Fatihe delegacija Općine Novi Grad je odala počast žrtvama masakra na Trgu solidarnosti do broja 14, u naselju Alipašino Polje.

Prisutnima se obratila ministrica pravde i uprave Kantona Sarajevo, Mersa Kustura, koja je poručila da se o zločinima koji su počinjeni treba stalno govoriti, ne zbog prošlosti, nego zbog budućnosti, kako se takav gnusan čin ne bi ponovio.

“Ne volim praviti podjele među ljudima, ali osjećam potrebu da spomenem da neprijateljska artiljerija nije birala ni godine, ni spol, niti vjersku, ni nacionalnu pripadnost. Premalo je osuditi par ljudi za patnju svih građana tokom četiri godine opsade, a kamo li za preko 12.000 ubijenih građana i djece i preko 60.000 ranjenih”, kazala je Kustura.

Dodala je da se bez obzira na prošlost naša budućnost mora graditi na ravnopravnosti svih naroda i građana, da se mora istrajavati na idejama na kojima BiH može i mora opstati, a to su ideje suživota, međusobnog uvažavanja i tolerancije. Međutim, naglasila je, da bi to bilo tako, pravda mora biti zadovoljena i počinioci strašnih zločina, pa i ovog koji danas obilježavamo, moraju biti adekvatno kažnjeni.





# Održana akademija u znak sjećanja na bosanskog gaziju i Zlatnog

## *Ljiljana Ramiza Salčina*

U organizaciji Općine Novi Grad i udruženja „Patriotska liga“ u multimedijalnoj sali Općine Novi Grad 22. augusta održana je akademija posvećena rahmetli Ramizu Salčinu.

Pomoćnik načelnika Semira Efendića za boračka pitanja, rad, socijalna pitanja i zdravstvo, Tajib Delalić u svom obraćanju prisutnima prisjetio se dana provedenih sa rahmetli Ramizom.

„On je bio neustrašiv. Rekao je Sarajevom će krv teći, nešto moramo učiniti. Nažalost, Nedžariće nije preživio. Ponosan sam što sam bio jedan od njegovih sljedbenika, što sam proveo jedan dio života sa njim. Mogla bi se cijela knjiga napisati o onome što je on učinio“, kazao je Delalić.

Ministar za boračka pitanja Kantona Sarajevo, Hajrudin Grabovica, naglasio je da ovakvi skupovi imaju veliki značaj i da su oni obaveza svih nas da bi se održalo sjećanje na komandanta, ali i da bi se ukazalo na značaj njegovih djela.

„Djelo mora biti inspiracija, mora biti podstrek, mora biti putokaz. To je pouka koju moramo izvući iz današnjeg datuma i današnjeg događaja. Ima lokalnih zajednica koje ove i ovakve događaje gaje i Novi Grad je po tome prepoznatljiv. Političke snage koje su projektovale nestanak BiH još uvijek su na sceni. Moramo biti svjesni odgovornosti i obaveze prema ljudima poput komandanta Salčina“, rekao je Grabovica.

Prikazan je kratki dokumentarni film pod nazivom „Ramiz Salčin je živ, samo vi to možda ne osjećate“ koji govori o herojskim podvizima komandanta Općinskog štaba Teritorijalne odbrane Novi Grad.



## *28. godišnjica od pogibije legendarnog komandanta i heroja Ramiza Salčina*

Polaganjem cvijeća na spomen-obilježje na mjestu pogibije u Saraj-Polju i učenjem Fatihe, porodica, prijatelji i brojne delegacije su odali počast komandantu i heroju odbrambeno-oslobodilačkog rata, rahmetli Ramizu Salčinu.

Ramiz Salčin je bio neustrašiv i nepokolebljiv, i kao takav, postavljen je za komandanta Općinskog štaba Teritorijalne odbrane Novog Grada. Komandovao je i koordinirao ključnim bitkama na Žuči, Mojmilu i Dobrinji, te uvezivao jedinice, patriote, odrede i samostalne bataljone u brigade Oružanih snaga Armije RBiH.

Prisutnima se obratio Tajib Delalić, pomoćnik načelnika Općine Novi Grad za boračka pitanja, rad, socijalna pitanja i zdravstvo, koji je rekao da je pogibija rahmetli Ramiza Salčina predstavljala nesaglediv gubitak za Novi Grad i odbranu Bosne i Hercegovine.

„U nagovještaju zla koje će krenuti na državu BiH, a to se vidjelo posebno iz Srbije i izdajom unutrašnjih snaga bosanskih Srba, Ramiz se aktivno uključuje u organizaciju odbrane Sarajeva i države BiH. Daje nemjerljiv doprinos u stvaranju Armije RBiH, aktivno učestvuje u odbrani grada, formira prve linije odbrane na Mojmilu, učestvuje u oduzimanju velike količine oružja i materijalno-tehničkih sredstava iz kasarni JNA“, kazao je Delalić.







## Obilježen Dan deblokade Dobrinje

Polaganjem cvijeća i učenjem Fatihe na parking prostoru u ulici Trg djece Dobrinje, obilježeno je 28 godina od deblokade Dobrinje.

Dobrinja je za agresora bila od taktičkog i strateškog značaja, jer se nalazila u blizini aerodroma, okružena kasarnama i skladištima vojne opreme. Stotinjak dana je ovo naselje bilo u dvostrukom obruču, a pripadnici Teritorijalne odbrane su pokazali hrabrost i odlučnost u odbrani ovog naselja od agresora.

Tajib Delalić, pomoćnik načelnika za boračka pitanja, rad, socijalna pitanja i zdravlje, u obraćanju prisutnima, upozorio je na jačanje fašističkih snaga, koje nikad ne miruju, samo se pritaje i čekaju priliku da napadnu.

„Jake snage su bile koncentrisane oko Dobrinje, ona je bila značajno čvorište kuda su se htjele kretati četničke snage. Hrabri branioци Dobrinje su to spriječili. Fašizam malo miruje i kad mu se ukaže prilika, izleti iz ljudi, pa oni napadaju nedužne ljude. Moramo biti oprezni, jer fašizam se samo pritajio i napast će nas čim mu se pruži prilika“, poručio je Delalić.

Adem Kajanija, predsjednik JOB „Unija veterana“ Novi Grad, kazao je da je u periodu agresije granatiranje bilo svakodnevno, te je donesena odluka da se 2. septembra krene sa deblokadom Dobrinje, ali i Sarajeva.

„Civilni su ginuli u redovima za vodu i hljeb. Linije razgraničenja su bile nedaleko od ovog parkinga, naša prva linija je bila u jednoj zgradi, a četnička u drugoj. Akcija je počela u jutarnjim satima, četnici su nas dočekali čim smo prešli cestu. Međutim, oni nisu uspjeli pomoći linije razgraničenja zahvaljujući Dobrinjcima. Svaki dan bi se moglo pisati o akcijama na Dobrinji“, kazao je Kajanija.

On je istakao da se mora podići kultura sjećanja na jedan viši nivo i prenijeti na omladinu kroz školske i druge aktivnosti.



## Dan sjećanja na šehide i poginule borce: Novi Grad je dao 1.960 boraca za državu Bosnu i Hercegovinu

Polaganjem cvijeća na spomen-obilježje u B-fazi i učenjem Fatihe obilježen je Dan sjećanja na šehide i poginule borce šest mjesnih zajednica Alipašinog Polja (A1, A2, B1, B2, C1 i C2).

Na spomen-obilježje poginulim borcima, 14. augusta, cvijeće su položile delegacije Općine Novi Grad, Udruženja „Organizacija porodica šehida i poginulih boraca“, Koordinacije boračkih udruženja Općine Novi Grad, predstavnici savjeta mjesnih zajednica Alipašinog Polja, te predstavnici političkih stranaka.

Prisutnima su se obratili pomoćnik načelnika Općine Novi Grad za boračka pitanja, rad, socijalna pitanja i zdravlje Tajib Delalić i predsjednica Udruženja „Organizacija porodica šehida i poginulih boraca“ Emina Viteškić.

Program obilježavanja završen je recitacijom učenice Osnovne škole „Fatima Gunić“ Aide Lemešević, pod nazivom „Sjećanje na one kojih više nema“.





## ***Devet građana ubijeno dok su klanjali džezazu Fatimi Jusić***

U naselju Boljakov Potok, granatom ispaljenom sa položaja vojske RS iz pravca Nedžarića, 28. septembra 1992. godine, ubijeno je devet građana, prilikom obavljanja džezaze i ukopa sugrađanke Fatime Jusić.

Delegacija Općine Novi Grad je tim povodom odala počast ubijenim, učenjem Fatihe i polaganjem cvijeća na mjestu masakra, na mjesnom mezarju u Boljakovom Potoku, prisjećajući se onih koji su 1992. godine izgubili živote dok su klanjali džezazu sugrađanki Fatimi Jusić. Na džezazi se tog dana okupilo oko 200 ljudi, a sa agresorskih položaja ispaljene su dvije granate od čijeg je dejstva 9 osoba ubijeno, a 20 je teže i lakše ranjeno.

Od agresorske granate živote su izgubili Asim Cvrk, Meho Čakarić, Alija Čaušević, Imšir Kerla, Mustafa Karajčić, Ibrahim Šehović, Ramo Veljan, te dva još uvijek neidentifikovana muškarca.

Uz poziv da se svakodnevno prisjećamo zločina koji su počinjeni, da se oni ne bi ponovili, počast ubijenim sugrađanima su odale i porodice ubijenih, Nihada Glamoč, ministrica komunalne privrede i infrastrukture Kantona Sarajevo, delegacija Grada Sarajeva, predstavnici Savjeta Mjesne zajednice "Alipašin Most I", Unije civilnih žrtava rata, te predstavnici političkih subjekata koji djeluju na području Novog Grada.



## ***Granatom ispaljenom s agresorskih položaja iz Nedžarića ubijeno šest građana, među kojima troje djece***

Obilježena je 28. godišnjica masakra na Trgu ZAVNOBiH-a kod brojeva 10 - 12, u naselju Alipašino Polje. Granatama ispaljenim sa agresorskih položaja vojske Republike Srpske, iz pravca Nedžarića, ubijeno je šest građana, od kojih troje djece. Najstarije dijete imalo je petnaest, a najmlađe sedam godina.

Polaganjem cvijeća na spomen-obilježje i učenjem Fatihe, 21. septembra, članovi porodica i prijatelji ubijenih, delegacije Općine Novi Grad, Udruženja roditelja ubijene djece opkoljenog Sarajeva 1992 -1995., Savjeta Mjesne zajednice Alipašino Polje B-2 su odale počast ubijenim sugrađanima.

Obilježavanju tužne godišnjice prisustvovala je i Bahra Hodžić, majka, čiji je sin Adnan ubijen snajperskim hicem na Stupu. Boli kaže Bahra gubitak djeteta, ali boli i nepravda. Nada se Bahra da će krivično odgovarati svi oni koji su u agresorskim pohodima ubijali djecu, al i ostalo nedužno stanovništvo.

"Moje dijete je nasilno ubijeno, snajperom, na Stupu. Osjećam tugu i bol za svom djecom Sarajeva. Boli me nepravda, daj Bože da dođe pravda i da budu osuđeni svi oni koji su ubili, ne samo moje dijete, nego svu djecu Sarajeva", rekla je Bahra Hodžić.







## Besplatna sportska rehabilitacija za borce Armije RBiH iz Novog Grada na Olimpijskom bazenu Otoka

Na Olimpijskom bazenu Otoka realiziran je program sportske rehabilitacije i vježbanja u vodi za pripadnike boračke populacije sa područja općine Novi Grad.

Općina Novi Grad izdvojila je potrebna finansijska sredstva za realizaciju ovog projekta koji je trajao šest mjeseci, a obuhvatio je 600 pripadnika boračke populacije.

Pravo apliciranja na ovaj projekat imali su pripadnici Armije RBiH, bez obzira na to da li su članovi boračkih udruženja i organizacija.

Korisnicima ovog programa na usluzi su bili profesori sporta i tjelesnog odgoja koji vrše nadzor i daju instrukcije i savjete, kazao je koordinator projekta i profesor sporta Roman Kebat.

„Uzeo se u obzir svaki benefit koji voda pruža, sam boravak u vodi, kao i uticaj plivanja kao jednog od najzdravijih sportova. Borci su imali slobodu izbora da se rekreiraju na bazenu uz hidromasažere ili plivajući u velikom bazenu uz stalni nadzor profesora sporta i tjelesnog odgoja koji je tu na raspolaganju za savjete“, rekao je Kebat.



## Općina Novi Grad pomaže mladima u otplati kredita za kupovinu stana

Općina Novi Grad Sarajevo i ove godine sufinansira stambene kredite mladim osobama s područja općine koji prvi put rješavaju stambeno pitanje, a za tu namjenu iz općinskog budžeta izdvojeno je 100 hiljada maraka.

Za subvencionirana sredstva mogli su se prijaviti mladi do 35 godina starosti, sa mjestom prebivališta u općini Novi Grad zadnje tri godine, koji su kreditno sposobni. Kreditna sredstva mogu se dobiti u najvećem pojedinačnom iznosu do 120.000 KM sa rokom otplate do dvadeset godina, a ukoliko su aplikanti u bračnoj zajednici, jedan od uslova za prijavu na ovaj program je i taj da nijedan bračni partner nema riješeno stambeno pitanje.

Pomoć mladima u rješavanju stambenog pitanja jedan je od projekata iz Programa Novi Grad 2020, kojim Općina Novi Grad sufinansira tri posto kreditne kamatne stope stambenih kredita za prvih pet godina otplate kredita.

Bosna Bank International (BBI) Sarajevo, koja je za realizaciju ovog programa odabrana procedurom javne nabavke i Općina Novi Grad Sarajevo potpisale su ugovor o poslovnoj saradnji, kojim su u BBI banci osigurana sredstva za finansiranje kupovine nekretnine za mlade na području ove općine u iznosu od 6,3 miliona maraka.

Program finansijske pomoći za mlade osobe koje prvi put rješavaju svoje stambeno pitanje Općina Novi Grad pokrenula je 2017. godine u nastojanju da mlade ljude ohrabri i omogući im bolje uslove da na lakši način kupe stan ili kuću.





## U Buća Potoku postavljen kamen-temeljac za izgradnju Nur džamije

U naselju Buća Potok, 25. septembra, postavljen je kamen - temeljac za izgradnju džamije koja će nositi naziv "Nur džamija" - Džamija svjetlosti.

Kamen - temeljac postavili su muftija sarajevski i zamjenik reisu-l-uleme prof. dr. Enes Ljevaković, glavni imam Medžlisa Islamske zajednice (MIZ) Sarajevo dr. Abdulgafar Velić sa načelnikom Općine Novi Grad Semirom Efendićem, a svečanosti su prisustvovali zvaničnici iz vjerskog i društvenog života i građani.

Na svečanosti su se obratili i glavni imam MIZ Sarajevo dr. Velić, načelnik Općine Novi Grad Semir Efendić i Tajib Delalić u ime Građevinskog odbora za izgradnju džamije.

Džamija će se graditi na lokalitetu između ulica Adema Buće i Bratunačka. Valiki broj vjernika ovog dijela jednog od najvećih novogradskih naselja, do prve džamije pješači oko kilometra, kao i njihova djeca koja pohađaju mektebsku nastavu. Nova džamija olakšat će im obavljanje vjerskih dužnosti.

Ukupna vrijednost projekta iznosi 1.200.000 KM, a obuhvata džamiju sa kućom za imama. Izgradnja će se vršiti fazno od prikupljenih sredstava od donatora koji žele da investiraju u vjerski objekat. U prvoj fazi gradiće se objekat bez munare i koštat će oko 457.000 KM

U okviru programa svečanost su uljepšali i članovi hora MIZ Sarajevo izvedbom ilahija i kasida.







## ***Simbolična pomoć od Općine Novi Grad porodicama sa troje, više djece i blizancima***



U Općini Novi Grad, 9. oktobra, upriličen je prijem i uručenje rješenja za dodjelu simbolične pomoći od po 500 KM za 48 porodica koje su u ovoj godini dobile blizance, treće, četvrto i svako naredno dijete. Ovakav vid simbolične pomoći porodicama koje se odluče za više djece, Općina Novi Grad realizira šestu godinu s ciljem pružanja podrške natalitetu i osnaživanju porodice. Za tu namjenu iz ovogodišnjeg budžeta izdvojeno je 100.000 KM.

Uz čestitke sretnim roditeljima, općinski načelnik Semir Efendić kazao je da je to simboličan poklon lokalne zajednice roditeljima koji se odluče za više djece. Istakao je da ova lokalna zajednica nastoji uraditi više da stanovnicima u Novom Gradu život bude ugodniji. Općina, kroz različite programe koje realizira, prati stanovništvo kroz cijeli životni vijek, počev od rođenja, predškolskog odgoja, školovanja, zaposlenja, pa sve do penzionerskih dana, tako da se u Novom

Gradu mogu osjećati da imaju krov nad glavom, da imaju normalan životni vijek, pa i u penzionerskim danima i da neko o njima brine.

Više od 850 porodica, sa više od hiljadu djece, u proteklih 6 godina kako ova lokalna zajednica provodi program, dobilo je ovu vrstu podrške Općine. To je jedan od programa koji se provodi u cilju podrške porodicama koje žive u našoj općini, kako bi im život bio što jednostavniji i lakši.

Uz ovu vrstu pomoći, Općina Novi Grad je prva lokalna zajednica koja je uvela dodatnu podršku iz budžeta za porodilje koje su nezaposlene, obzirom na razliku koja postoji u nadoknadama koje primaju zaposlene porodilje i one koje nisu u radnom odnosu. Za tu namjenu, već nekoliko godina iz općinskog budžeta izdvaja se oko 300.000 KM godišnje, tako da nezaposlene porodilje, uz naknadu koju primaju sa viših nivoa, od Općine mjesečno primaju po 50 KM.





## *Nakon četvero djece, Elvira je na svijet donijela i blizance*

Tridesetšestogodišnja Elvira Zeba, majka je šestero djece. Nakon četvero djece, ove godine rodila je blizance.

“Najstarijem je 10 godina, zatim imam djevojčice od 8 i 6 godina i dječaka od 4 godine, a sada smo dobili i blizanke koje imaju 5 mjeseci. Dan je uvijek ispunjen dječjom grajom, igrom. Starija djeca pomognu i sve se stigne. U današnjem vremenu su nam nametnute neke druge vrijednosti, majčinstvo i nije baš toliko, ali nastojimo ići u skladu sa novim trendovima kada se i o dojenju više govori i majčinstvu, zdravoj trudnoći i porodima. Tako da ja radim na promociji toga kroz svoj lični primjer, društveno sam aktivna i radim kao savjetnica za dojenje sa majkama, trudnicama, porodiljama”, kaže Elvira i dodaje:

“Dojenje je prvi preduslov za zdravo dijete. Ova vrsta pomoći koju Općina Novi Grad daje porodiljama je zaista značajna, pa i samo priznanje je značajno, da neko kaže hvala i uruči zahvalnicu što se radi na natalitetu, jer je djece iz dana u dan sve manje i manje. U nekim školama, u drugim općinama, nedostaju cijeli razredi djece. Naša Općina se puno razlikuje od drugih, i prednjači u svemu, pa i u podršci porodici”.



## *Starija djeca puno pomažu*

Medisa Hrbinić, majka troje djece, priča nam da treće dijete ne predstavlja dodatno opterećenje, dvoje starijih puno pomažu. “Kćerka Amina je krenula u prvi razred srednje škole, a Kerim je drugi razred osnovne škole. Ova sredstva itekako dobro dođu, s obzirom da imam dvoje djece koja idu u školu, bebu koja iziskuje svoje potrebe”, kaže Medisa





## *Oko 150 tona krompira bit će podijeljeno javnim kuhinjama i socijalno ugroženim porodicama*

U proljeće ove godine, kada je zbog pandemije koronavirusa cijeli svijet bio blokiran, Civilna zaštita općine Novi Grad u saradnji sa JP "Lokom" i PD "Butmir", pored ostalih aktivnosti koje je provodila, obradila je oko 100 dunuma neobrađenog zemljišta na prostoru Rajlovca i posijala krompir.

Bila je to jedna u nizu aktivnosti koje je Općina Novi Grad realizirala kako bi odgovorila na krizu uzrokovanu koronavirusom. Razmišljalo se o tome da se prije svega osigura hrana.

Nakon proljetne sjetve i provođenja svih agropedoloških mjera u toku ove sezone, Civilna zaštita radi na vađenju i transportu krompira koji se smješta u skladište. Dnevno se iz zemlje izvadi i spakuje od 250 do 300 vreća krompira. Očekuje se da prinosi budu oko 150 tona krompira, a cijeli urod bit će podijeljen javnim kuhinjama, socijalno ugroženim porodicama i starijima koji nisu bili u mogućnosti sami za sebe proizvesti zimnicu.











## ***TIKA donirala terensko vozilo GSS Novi Grad Sarajevo***





Turska agencija za saradnju i koordinaciju (TIKA) prepoznala je rad i doprinos spasilaca - volontera Gorske službe spašavanja Novi Grad Sarajevo, te im je donirala terensko vozilo marke Toyota Hilux, koje će im biti od pomoći prilikom obavljanja akcija spašavanja.

Primopredaji ključeva vozila prisustvovali su načelnik Općine Novi Grad Semir Efendić, ambasador Republike Turske Haldun Koc, koordinator TIKA-e u BiH Muhammed Unal i rukovodilac GSS Novi Grad Sarajevo Fahrudin Dobrača.

Kako BiH nema zakon o gorskim službama, Gorska služba spašavanja Novi Grad Sarajevo djeluje u sklopu Civilne zaštite Općine Novi Grad Sarajevo, te učestvuje u akcijama na području cijele Bosne i Hercegovine.

„Imali su veliki problem sa nedostatkom terenskog vozila, mi smo im posuđivali dva vozila iz Civilne zaštite Općine Novi Grad i veoma sam sretan što će od danas i oni imati vlastito, koje će moći da koriste u akcijama spašavanja. U prvoj fazi lockdowna uzrokovanog koronavirusom, GSS je bio od najveće pomoći našoj Civilnoj zaštiti u svim vrstama asistencije. Našli su se na usluzi našim građanima. Ovim putem bih se zahvalio TIKA-i što je podržala njihov rad“, kazao je Semir Efendić, načelnik Općine Novi Grad Sarajevo.

TIKA i GSS Novi Grad Sarajevo ostvarili su uspješnu saradnju u proteklom periodu, u okviru koje su realizovane razne edukacije.


„Suština turske vanjske politike je čovjek i humanost. U vrijeme pandemije smo svi mogli vidjeti koliko je važno investirati u čovjeka i njegove mogućnosti da se on odupre u ovako teškim situacijama. Uvjereni smo da će GSS Novi Grad nastaviti sa svojom nesebičnom ulogom i zalaganjem u spašavanju ljudi. Drago mi je da smo i mi dali neki doprinos da ova služba može lakše i bolje da obavlja svoj zadatak“, kazao je ambasador Republike Turske Haldun Koc.

Rukovodilac GSS-a Novi Grad Sarajevo, Fahrudin Dobrača, podsjetio je da je ove godine trebala biti realizovana obuka o zemljotresima i nesrećama, ali da je zbog pandemije realizacija mnogih projekata odgođena.

„Bez jednog ovakvog vozila ne možemo adekvatno odgovoriti zadacima i potrebama. Ova donacija će doprinijeti našoj efikasnosti. Ovaj posao se radi iz ljubavi, najveća nagrada nam je kad neku akciju završimo sa pozitivnim rezultatom“, kazao je Dobrača i naglasio da građani prije nego kontaktiraju GSS moraju kontaktirati i policiju.

Muhammed Unal, koordinator TIKA-e u BiH, kazao je da donacija vozila GSS-u predstavlja vrhunac saradnje, te je istakao zadovoljstvo činjenicom da vozilo doniraju volonterima koji su dostupni kada je najpotrebnije.

Pripadnici GSS-a su izveli pokaznu vježbu spašavanja ozlijeđene osobe iz visokog objekta, na kojem su se stepenice urušile prilikom zemljotresa.







**KINO**  
**NOVI GRAD**

# PONOVO SAVAMA

**od 15.01.2021.**

VEČERNJE PROJEKCIJE  
**ČETVRTKOM, PETKOM  
I SUBOTOM U 19.30h**

DJEČIJI FILMOVI  
**SUBOTOM u 13.00h  
I NEDJELJOM u 13.00 i 17.00h**

[www.kino.novigradsarajevo.ba](http://www.kino.novigradsarajevo.ba)

 /kinonovigrad

